


土岐文庫  
文庫17  
W82  
8



文庫 17  
W 82  
8

貴人金多身復閑爭買書畫不計錢已將鐵石充逸少鐵

石梁武帝時人今法帖大玉書中有鐵石字更補朱繇為道世所收吳畫多朱繇筆也煙

薰屋漏裝玉軸鹿皮蒼壁知誰賢吳生畫佛本神授夢中

化作飛空僊覺來落筆不經意神妙獨到秋毫顛我昔長

安見此畫歎息至寶空潛然素絲斷續不忍看已作胡蝶

飛聯翩君能收拾為補綴體質散落嗟神全志公髣髴見

刀尺脩羅天女猶雄妍如觀老杜飛鳥句脫字欲補知無

緣問君乞得良有意欲將俗眼為洗前貴人一見定羞作

錦囊千紙何足捐不須更用博麻縷付與一炬隨飛煙

次韻答舒教授觀余所藏墨

異時長笑王會稽野鴛臙腥汗刀几莫年却得庾安西自

厭家雞題六紙二子風流冠當代顧與兒童爭慍喜秦王



昭和六年二月一日贈  
土岐善吉磨氏寄

010185188340

十八已龍飛嗜好晚將蛇蚓比我生百事不挂眼時人  
說云工此世間有癖念誰無傾身障簾尤堪鄙一生當著  
幾兩屐定心肯為微物起此墨足支三十年但恐風霜侵  
髮齒非人磨墨磨人併應未罄曩先耻逝將振衣歸故  
國數畝荒園自鉏理作書寄君君莫笑但覓來禽與青李  
一螺點漆便有餘萬竈燒松何處使君不見永寧第中檮  
龍麝列屋閑居清且美倒暈連眉秀嶺浮雙鴉畫髻香雲  
委時間五斛賜蛾綠不惜千金求懶隨聞君此詩當大笑  
寒窓冷硯冰生水

中秋月三首

殷勤去年月激灑古城東憔悴去年人卧病破窓中徘徊  
巧相覓窈窕穿房櫳月豈知我病但見歌樓空撫枕三歎

息扶杖起相從天風不相哀吹我落瓊宮白露入肝肺夜  
吟如秋蟲坐令太白豪化為東野窮餘年知幾何佳月豈  
屢逢寒魚亦不睡竟夕相唵囑

六年逢此月五年照離別

中秋有月凡六年矣惟  
去歲與子由會於此

歌君別

時曲滿坐為淒咽留都信繁麗此會豈輕擲鎔銀百頃湖  
挂鏡千尋闕三更歌吹罷人影亂清樾歸來北堂下寒光  
翻露葉喚酒與婦飲念我向兒說豈知衰病後空盞對梨  
栗但見古河東麩麥如鋪雪欲和去年曲復恐心斷絕

舒子在汶上閉門相對清

舒換賦舉  
人鄭州

鄭子向河朔

趙子孤舟連夜行頓子雖咫尺如在牢局

寄書來水調有餘聲

今日得趙某卿書猶記余在  
東武中秋所作水調歌頭

悠哉四

子心共此千里明明月不解老良辰難合并回顧坐土人

聚散如流萍嘗聞此宵月萬里同陰晴故人文生為余言嘗見海賈云中伏有月則是歲珠多而圓賈人嘗以此候之雖相去萬里他日會合相問陰晴無不同者天公自著意此會那可輕明年各相望俯仰今古情

和子由中秋見月

明月未出羣山高瑞光千丈生白毫一杯未盡銀闕涌亂雲脫壞如崩濤誰為天公洗眸子應費明河千斛水遂令冷看世間人顧我湛然心不起西南火星如彈丸角尾奕奕蒼龍蟠今宵注眼看<sub>不見</sub>更許螢火爭清寒何人艤舟臨古汴千燈夜作魚龍變曲折無心逐浪花低昂赴節隨歌板是夜賈客舟中放水燈青熒滅沒轉前山浪颭風迴豈復堅明月易低人易散歸來呼酒更重看堂前月色愈清好咽咽寒蟬鳴露草卷簾推戶寂無人窓下唧啞惟楚老近有一孫名楚

老南都從事莫羞貧對月題詩有幾人明朝人事隨日出  
恍然一夢瑤臺客

與頓起孫勉泛舟探韻得未字

窓前堆梧桐牀下鳴絡緯佳人尺書到客子中夜喟朝來一樽酒晤語聊自慰秋蠅已無聲霜蟹初有味當為壯士飲耻裂須磔禡勿作兒女懷坐念蠪蛸畏山城亦何有一笑瀉肝胃泛舟以娛君魚鼈多可餽縱為十日飲未遽主人費吾儕俱老矣耿耿知自貴寧能傍門戶啼笑雜猥狒要將百篇詩一吐千丈氣蕭條歲行莫迨此霜雪未明朝出城南遺迹觀楚魏西風迫吹帽金菊亂如沸願君勿言歸輕別吾所諱

九日黃樓作

去年重陽不可說南坡夜半千漚發水穿城下作雷鳴泥  
滿城頭飛雨滑黃花白酒無人問日暮歸來洗鞢襪豈知  
還復有今年把盞對花容一呷莫嫌酒薄紅粉陋終勝泥  
中事歛鋪黃樓新成壁未乾青河已落霜初殺朝來白露  
如細雨南山不見千尋剝樓前便作海茫茫樓下空聞榜  
鴉軋薄寒中人老可畏熱酒澆腸氣先壓煙消日出見漁  
村遠水鱗鱗山鬱鬱詩人猛士雜龍虎坐客三十餘人多知名之士楚  
舞吳歌亂鵝鴨一杯相屬君勿辭此境何殊泛清雪

九日次韻王鞏

我醉欲眠君罷休已教從事到青州烏霜饒我三千丈詩  
律輸君一百籌聞道郎君閉東閣且容老子上南樓相逢  
不用忙歸去明日黃花蝶也愁

送頓起

客路相逢難爲樂常不足臨行挽衫袖更賞折殘菊佳人  
亦何念淒斷陽關曲酒闌不忍去共接一寸燭留君終無  
窮歸駕不免促岱宗已在眼一往繼前躅天門四十里夜  
看扶桑浴回頭望彭城大海浮一粟故人在其下塵土相  
逐蹴惟有黃樓詩千古配淇澳頓有詩記黃樓本末

次韻王鞏顏復同泛舟

沈郎清瘦不勝衣邊老便便帶十圍躡蹠身輕山上走謹  
呼船重醉中歸舞腰似雪金釵落談辯如雲玉塵麾憶在  
錢塘正如此回頭四十二年非

與參寥師行園中得黃耳蕈

遣化何時取衆香法筵齋鉢久淒涼寒蔬病甲誰能採落

葉空畦半已荒老楮忽生黃耳菌故人兼致白牙薑蕭然  
放筯東南去又入春山筍蕨鄉

百步洪 并序

王定國訪余於彭城一日棹小舟與顏長道攜盼英卿  
三子游泗水北上聖女山南下百步洪吹笛飲酒乘月  
而歸余時以事不得往夜着羽衣佇立於黃樓上相視  
而笑以爲李太白死世間無此樂三百餘年矣定國既  
去逾月復與參寥師放舟洪下追懷曩遊已爲陳迹喟  
然而嘆故三詩不遺矣佳入未宥回秋波幼輿欲語防飛梭輕舟弄水買一笑醉  
中蕩槳肩相磨不似長安閭里俠貂裘夜走燕脂坡獨將  
詩句擬鮑謝涉江共採秋江荷不知詩中道何語但覺兩

頰生微澗我時羽服黃樓上坐見織女初斜河歸來笛聲  
滿山谷明月正照金叵羅奈何捨我入塵土擾擾毛羣欺  
卧駝不念空齋老病叟退食誰與同委蛇時來洪上看遺  
迹忍見履齒青苔窠詩成不覺雙淚下悲吟相對惟羊何  
欲遣佳人寄錦字夜寒手冷無人呵

夜過舒堯文戲作

先生堂前霜月苦弟子讀書喧兩廡推門入室書縱橫蠅  
紙燈籠晃雲母先生骨清少眠卧長夜默坐數更鼓耐寒  
石硯欲生水得火銅餅如過雨郎君欲出先自替坐客斂  
衽誰敢侮明朝阮籍過阿戎應作羲之美懷祖

次韻王廷老退居見寄

接果移花看補籬腰鎌手斧不妨持上都新事長先到老

圃閑談未易欺釀酒閉門開社壘殺牛留客解耕磨何時  
得見纖纖玉右手持盃左捧頤

祈雪霧猪泉出城馬上作贈舒堯文

二年走吳越踏遍千里山朝隨白雲去莫與栖鴉還翩如  
得木狃飛步誰能攀一為符竹累坐老鼓榜間此行亦何  
事聊散腰脚頑浩蕩城西南亂山如玦環山下野人家桑  
柘雜榛菅歲晏風日暖人牛相對閑薄雪不蓋土麥苗稀  
可刪願君發豪句嘲談破天慳

種松得徠字

其四在懷古堂其六在石經院

春風吹榆林亂英飛作堆荒園一雨過戢戢千萬栽青松  
種不生百株望一枚一枚已有餘氣壓千畝槐野人易斗  
粟云自魯徂徠魯人不知貴萬竈飛青煤束縛同一車胡

為乎來哉泫然解其縛清泉洗浮埃枝傷葉尚困生意未  
肯回山僧老無子養護如嬰孩坐待走龍蛇清陰滿南臺  
孤根裂山石直幹排風雷我今百日客養此千歲材時去替不  
百茯苓無消息雙鬢日夜催古今一俛仰作詩寄餘哀  
往在東武與人往反作粲字韻詩四首今黃魯直亦

次韻見寄復和答之

符堅破荆州止獲一人半中郎老不遇但喜識元歎我今  
獨何幸文字厭奇玩又得天下才相從百憂散陰求我輩  
人規作林泉伴寧當待垂老倉卒收一旦不見梁伯鸞空  
對孟光案才難不其然婦女廁周亂世豈無作者於我如  
既盥獨喜誦君詩咸韶音節緩夜光一已多矧獲纍纍貫  
相思君欲瘦不往我真孺吾儕眷微祿寒夜抱寸炭何時

東坡詩集 卷之八  
定相過徑就我乎館飄然東南去江水清且渙相與訪名山微言師忍粲

送蜀人張師厚赴殿試

忘歸不覺髣毛斑好事鄉人尚往還斷嶺不遮西望眼送君直過楚王山

罷徐州往南京馬上走筆寄子由

吏民莫扳援歌管莫悽咽吾生如寄耳寧獨爲此別別離隨處有悲惱緣愛結而我本無恩此涕誰爲設紛紛等兒戲鞭鞅遭割截道邊雙石人幾見太守發有知當解笑撫掌冠纓絕

父老何自來花枝鬢長紅洗琺拜馬前請壽使君公前年無使君魚鼈化兒童舉鞭謝父老正坐使君窮窮人命分惡所向招災凶水來非吾過去亦非吾功

贈惠山僧惠表

行遍天涯意未闌將心到處遣人安山中老宿依然在案上楞嚴已不看欹枕落花餘幾片閉門新竹自千竿客來茶罷空無有盧橘楊梅尚帶酸

與秦太虛參寥會于松江而關彥長徐安中適至分韻得風字二首

吳越溪山興未窮又扶衰病過垂虹浮天自古東南水送客今朝西北風絕境自忘千里遠勝遊難復五人同舟師不會留連意擬看斜陽萬頃紅

二子緣詩老更窮人間無處吐長虹平生睡足連江雨盡日舟橫擘岸風人笑年來三黜憤天教我輩一樽同知君



東坡詩集 三十一  
欲寫長相憶更送銀盤尾鬣紅

送劉寺丞赴餘姚

中和堂後石楠樹與君對牀聽夜雨玉笙哀怨不逢人但  
見香煙橫碧縷謳吟息歸出無計坐想蟋蟀空房語明朝  
開鑠放觀潮豪氣正與潮爭怒銀山動地君不看獨愛清  
香生雪霧別來聚散如宿昔城郭空存鶴飛去我老人間  
萬事休君亦洗心從佛祖手香新寫法界觀眼淨不覩登  
伽女餘姚古縣亦何有龍井白泉甘勝乳千金買斷顧渚  
春似與越人降日注

李公擇過高郵見施大夫與孫莘老賞松詩憶與僕

去歲會于彭門折花饋筍故事作詩二十四韻見  
戲依韻奉答亦以一戲公擇云爾

汝陽真天人絹帽著紅槿纏頭三百萬不買一微哂其誇  
青山峰曲盡花不墮當時謫仙人逸韻謝封畛詩成天一  
笑萬象解寒窘驚開小桃杏不待雷發軫餘波尚涓滴乞  
與居易植爾來誰復見前輩風流盡寂寞兩詩人殘紅對  
櫻筍飢腸得一醉妙語傳不泯君來恨不與便復相牽引  
我老心已灰空煩扇餘燼天遊照六鑿虛空掃充物懸知  
色竟空那復嗜鳥吻蕭然一方丈居士老龐蘊散花從滿  
被不答天女問故人猶故日怨句寫餘恨疑我此心在遮  
防費欄楯應虞已斃虵折尾時一蠶又聞孟光賢未學處  
仲忍開閣放出寄招應已足左右侍雲鬢何時花月夜羊  
酒謝不敏此生如幻耳戲語君勿愠應同亡是公一對子  
虛聽

東坡詩集 四十一  
乘舟過賈收水閣收不在見其子二首

愛酒陶元亮能詩張志和青山來水檻白雨滿漁簑淚垢  
添下面貧低舉案蛾不知何所樂竟夕獨酣歌  
嫋嫋風蒲亂猗猗水荇長小舟浮鴨綠大杓瀉鵝黃得意  
詩酒社終身魚稻鄉樂哉無一事何處不清涼

泛舟城南會者五人分韻賦詩

紫蟹鱸魚賤如土得錢相付何曾數碧筩時作象鼻彎白  
酒微帶荷心苦運肘風生看斫膾隨刀雪落驚飛縷不將  
醉語作新詩飽食應慙腹如鼓

與胡祠部遊法華山

陂湖欲盡山爲界始見寒泉落高派道人未放泉出山曲  
折虛堂瀉清快使君年老尚兒戲綠棹紅船舞澎湃一笑

翻杯水濺裙餘權濯足波生隘長松攬天龍起立蒼藤倒

谷雪崩壞仰穿蒙密得清曠一覽震澤吁可怪誰云四萬

八千頃渺渺東盡日所矚歸塗十里盡風荷清唱一聲聞

露薤是日樂工有作此聲者嗟余少小慕真隱白髮青衫天所械忽

逢佳士與名山河異枯楊便馬疥君猶鸞鶴偶飄墮六翮

如雲豈長鍛不將新句紀茲遊悉負山中清淨債

又次前韻贈賈耘老

具區吞滅三州界浩浩湯湯納千派從來不著萬斛船一  
葦漁舟恣奔快仙壇古洞不可到空聽餘瀾鳴泮泮今朝  
偶上法華嶺縱觀始覺人寰隘山頭卧碣弔孤冢下有至  
人僵不壞空餘白棘網秋蟲無復青蓮出幽怪專見本院碑我  
來徙倚長松下欲掘茯苓親洗晒聞道山中富奇藥往往

靈芝雜莢薤詩人空腹待黃精三事只看長柄械杜子美詩云長  
鏡短鏡白木柄我今年大熟期一飽食葉微蟲真癖疥  
生託子以為命今年大熟期一飽食葉微蟲真癖疥  
有小蟲葉白花半落紫穠香攘臂欲助磨鎌鍛安得山泉  
不甚為害變春酒與子一洗尋常債

陳季常所畜朱陳村嫁娶圖

何年顧陸丹青手畫作朱陳嫁娶圖問道一村惟兩姓不  
將門戶買崔盧

我是朱陳舊使君勸耕曾入杏花村而今風物那堪畫縣  
吏催錢夜打門朱陳村在徐州蕭縣

初到黃州

自笑平生為口忙老來事業轉荒唐長江遶郭知魚美好  
竹連山覺筍香逐客不妨員外置詩人例作水曹郎只慙

無補絲毫事尚費官家壓酒囊檢校官劄折吏多得退酒

定惠院寓居月夜偶出

幽人無事不出門偶逐東風轉良夜參差玉宇飛木末繚  
繞香煙來月下江雲有態清自媚竹露無聲浩如瀉已驚  
弱柳萬絲垂尚有殘梅一枝亞清詩獨吟還自和白酒已  
盡誰能借不辭青春忽忽過但恐懽意年年謝自知醉耳  
愛松風會揀霜林結茅舍浮浮大甌長炊玉溜溜小槽如  
壓蔗飲中真味老更濃醉裏狂言醒可怕但當謝客對妻  
子倒冠落佩從嘲罵

次韻前篇

去年花落徐州對月酣歌美清夜去年徐州花下對月  
弟飲酒作今年黃州見花發小院閉門風露下萬事如花  
頰字韻詩

不可期餘年似酒那禁瀉憶昔還鄉沂巴峽落帆樊口在黃州南高梳亞長江袞袞空自留白髮紛紛寧少借竟無五畝繼沮溺空有千篇陵鮑謝至今歸計負雲山未免孤衾眠客舍少年辛苦真食蓼老景清閑如啖蔗飢寒未至且安居憂患已空猶夢怕尋花踏月飲村酒免使醉歸官長罵

寓居定惠院之東雜花滿山有海棠一株土人不知

貴也

江城地瘴蕃草木只有名花苦幽獨嫣然一笑竹籬間桃李漫山總籠俗也知造物有深意故遣佳人在空谷自然富貴出天姿不待金盤薦華屋朱唇得酒暈生臉翠袖卷紗紅映肉林深霧暗曉光遲日暖風輕春睡足雨中有淚亦悽愴月下無人更清淑先生食飽無一事散步逍遙自捫腹不問人家與僧舍拄杖敲門看修竹忽逢絕艷照衰朽歎息無言楷病目陋邦何處得此花無乃好事移西蜀寸根千里不易到銜子飛來定鴻鵠天涯流落俱可念爲飲一樽歌此曲明朝酒醒還獨來雪落紛紛那忍觸

雨晴後步至四望亭下魚池上遂自乾明寺前東岡

上歸

雨過浮萍合蛙聲滿四鄰海棠真一夢梅子欲嘗新拄杖閑挑菜鞦韆不見人慙慙木芍藥獨自殿餘春

杜沂遊武昌以酴醾花見餉

酴醾不爭春寂寞開最晚青蛟走玉骨羽蓋蒙珠幘不粧艷已絕無風香自遠淒涼吳宮闕紅粉埋故苑至今微月

夜笙歌來絕噓餘妍入此花千載尚清婉怪君呼不歸定  
爲花所挽昨宵雷雨惡花盡君應返

遷居臨皋亭

我生天地間一蟻寄大磨區區欲右行不救風輪左雖云  
走仁義未免遠寒餓劍米有危炊鉞羶無穩坐豈無佳山  
水借眼風雨過歸田不待老勇決凡幾箇幸茲廢棄餘疲  
馬解鞍馱全家古江驛絕境天爲破飢貧相乘除未見可  
弔賀澹然無憂樂苦語不成些

曉至巴河口迎子由

去年御史府舉動觸四壁幽幽百尺井仰天無一席隔墻  
聞歌呼自恨計之失留詩不忍寫苦淚漬紙筆餘生復何  
幸樂事有今日江流鏡面靜煙雨輕羃羃孤舟如鳧鷖點  
破千頃碧聞君在磁湖欲見隔咫尺朝來好風色旗尾西  
北擲行當中流見笑眼青光溢此邦疑可老修竹帶泉石  
欲買柯氏林茲謀待君必

次韻答子由

平生弱羽寄衝風此去歸飛識所從好語似珠穿一一忘  
心如膜退重重山僧有味寧知子龍吏無言只笑儂尚有  
讀書清淨業未容春睡敵千鍾

正月二十日往岐亭郡人潘古郭三人送余於女王

城東禪莊院

一本作代書寄桃山居士張聖可

十日春寒不出門不知江柳已搖村稍聞泱泱流水谷盡  
放青青沒燒痕數畝荒園留我住半甕濁酒待君溫去年  
今日關山路細雨梅花正斷魂

東坡八首 并叙

余至黃二年日以困匱故人馬正卿哀予乏食為於郡  
中請故營地數十畝使得躬耕其中地既久荒為茨棘  
瓦礫之場而歲又大旱墾闢之勞筋力殆盡釋耒而歎  
乃作是詩自懲其懃庶幾來歲之入以忘其勞焉

廢壘無人顧頽垣滿蓬蒿誰能指筋力歲晚不償勞獨有  
孤旅人天窮無所逃端來拾瓦礫歲旱土不膏崎嶇草棘  
中欲刮一寸毛喟然釋耒歎我廩何時高

荒田雖浪莽高庫各有適下隰種秔社東原蒔棗栗江南  
有蜀土桑果已許乞好竹不難栽但恐鞭橫逸仍須卜佳  
處規以安我室家童燒枯草走報晴井出一飽未敢期瓢  
飲已可必

自昔有微粟來從遠嶺背穿城過聚落流惡壯蓬艾去為

柯氏陂十畝魚蝦會歲旱泉亦竭枯萍粘破塊昨夜南山

雲雨到一犁外泫然尋故瀆知我理荒蒼泥芹有宿根一

寸嗟獨在雪芽何時動春鳩行可膾蜀人貴芹芽膾雜鳩肉作之

種稻清明前樂事我能數毛空暗春澤鍼水聞好語蜀人細

雨為雨毛稻初生時農夫相語稻鍼水矣分秧及初夏漸喜風葉舉月明看露

上一珠垂縷秋來霜穗重顛倒相撐拄但聞哇壠間炸

蟻如風雨蜀中稻熟時炸蟻羣飛田間如小蝗狀而不害稻新春便入甌玉粒照

筐筥我久食官倉紅腐等泥土行當知此味口腹吾已許

良農惜地力幸此十年荒桑柘未及成一麥糜可望投種

未逾月覆塊已蒼蒼農夫告我言勿使苗葉昌君欲富餅

餌要須縱牛羊再拜謝苦言得飽不敢忘

種棗期可剝種松期可斲事在十年外吾計亦已慙十年  
何足道千載如風電舊聞李衡奴此策疑可學我有同舍  
郎官居在瀟岳李公遺我三寸柑照坐光卓犖百栽儻可  
致當及春水渥想見竹籬間青黃垂屋角

潘子久不調沽酒江南村郭生本將種賣藥西市垣古生  
亦好事恐是押牙孫家有十畝竹無時客叩門我窮交舊  
絕三子獨見存從我於東坡勞餉同一餐可憐杜拾遺事  
與朱阮論吾師卜子夏四海皆弟昆

馬生本窮士從我二十年日夜望我貴求分買山錢我今  
反累生借耕輟茲田刮毛龜背上何時得成羶可憐馬生  
癡至今誇我賢衆笑終不悔施一當獲千

姪安節遠來夜坐

心衰面改瘦崢嶸相見惟應識舊聲永夜思家在何處殘  
年知汝遠來情畏人默坐成癡鈍問舊驚呼半死生夢斷  
酒醒山雨絕笑看飢鼠上燈檠

岐亭道上見梅花戲贈季常

蕙死蘭枯菊亦摧返魂香入嶺頭梅數枝殘綠風吹盡一  
點芳心雀啅開野店初嘗竹葉酒江雲欲落豆稽灰行當  
更向釵頭見病起烏雲正作堆

杭州故人信至齊安

昨夜風月清夢到西湖上朝來聞好語扣戶得吳餉輕圓  
白曬荔脆醃紅螺醬更將西庵茶勸我洗江瘴故人情義  
重說我必西向一年兩僕夫千里問無恙相期結書社故人  
相約釀錢雇僕未怕供詩帳僕頃以詩得罪有司移杭取  
未一歲再至黃境內所留詩杭州供數百首

謂之還將夢魂去一夜到江漲

江漲杭州橋名

和王鞏三首次韻

忘談陽朔山不作一錢直巖藏兩頭虺瘴落千仞翼雅宜  
羸免放頗訝虞舜陟蹙來已可畏覽鏡憂面黑况子三年  
囚苦霧變飲食吉人終不死仰荷天地德我來黃岡下歛  
枕江流碧江南武昌山向我如咫尺春蔬黃土軟凍筍蒼  
崖折此行我累君乃反得安宅遙知丹穴近爲屬响嘯石  
他年分刀圭名字挂仙籍

君許惠桂州丹砂

少年帶刀劍但識從軍樂老火服犁鉏解佩付鎔鑠雖無  
獻捷功會賜力田爵敲冰春擣紙刈葦秋織箔櫟林斬冬  
戾竹塢收芟籜四時俯有取一飽天所酢君生統絢間欲  
學非其脚左右玉纖纖東薪誰爲縛勿令聞此語翠黛頰

將惡笑我一間茆婦姑紛六鑿

君家玉臂貫銅青下客何時見目成勤把鈇黃記宮樣莫  
教絃管作蠻聲薰衣漸歎衙香少擁髻遙憐夜語清記取  
北歸攜過我南江風浪雪山傾

君自南江赴任不一過我

正月二十日與潘郭二生出郊尋春忽記去年是日

同至女王城作詩乃和前韻

東風未肯入東門走馬還尋去歲村人似秋鴻來有信事  
如春夢了無痕江城白酒三杯釀野老蒼顏一笑溫已約  
年年爲此會故人不用賦招魂

紅梅

怕愁貪睡獨開遲自恐冰容不入時故作小紅桃杏色尚  
餘孤瘦雪霜姿寒心未肯隨春態酒暈無端上玉肌詩老



不知梅格在更看綠葉與青枝

石曼卿紅梅詩云認桃無綠葉辨杏有青枝

二蟲

君不見水馬兒步步逆流水大江東流日千里此蟲趯趯長在此君不見鷄濫堆決起隨衝風隨風一去宿何許逆風還落蓬蒿中二蟲愚智俱莫測江邊一笑無人識

寒食雨

春江欲入戶雨勢來不已小屋如漁舟濛濛水雲裏空庖煮寒菜破竈燒濕葦那知是寒食但見烏銜紙君門深九重墳墓在萬里也擬哭塗窮死灰吹不起

徐使君分新火

臨臯亭中一危坐三見清明改新火溝中枯木應笑人鑽斫不然誰似我黃州使君憐久病分我五更紅一朶從來

破釜躍江魚只有清詩嘲飯顆起攜蠟炬遠空屋欲事烹煎無一可爲公分作無盡燈照破十方昏暗鏤

蜜酒歌 并叙

西蜀道士楊世昌善作蜜酒絕醇醲余旣得其方作此歌遺之

真珠爲漿玉爲醴六月田夫汗流泚不如春甕自生香蜂爲耕耘花作米一日小沸魚吐沫二日眩轉清光活三日開甕香滿城快瀉銀餅不須撥百錢一斗濃無聲甘露微濁醲醴清君不見南園採花蜂似雨天教釀酒醉先生先生年來窮到骨問人乞米何曾得世間萬事真悠悠蜜蜂大勝監河侯

又一首答二猶子與王郎見和

脯青苔炙青蒲爛蒸鵝鴨乃瓠壺煮豆作乳脂為酥高燒  
 油燭斟蜜酒貧家百物初何有古來百巧出窮人搜羅假  
 合亂天真詩書與我為麴蘖醞釀老夫成摺紳質非文是  
 終難久脫冠還作扶犁叟不如蜜酒無燠寒冬不加甜夏  
 不酸老夫作詩殊少味愛此三篇如酒美封  
 未已可  
 憐不知更有王郎子

魚蠻子

江淮水為田舟楫為室居魚鰕以為糧不耕自有餘異哉  
 魚蠻子本非左袵徒連排入江住竹瓦三尺廬於焉長子  
 孫咸施且侏儒擘水取魴鯉易如拾諸途破釜不着鹽雪  
 鱗芼青蔬一飽便甘寢何異懶與狙人間行路難踏地出  
 賦租不如魚蠻子駕浪浮空虛空虛未可知曾當算舟車

蠻子叩頭泣勿語桑大夫

弔李臺卿 并敘

李臺卿字明仲廬州人貌陋甚性介不羣而博學強記  
 罕見其比好左氏有史學考正同異多所發明知天文  
 律歷千載之日可坐數也軾謫居黃州臺卿為麻城主  
 簿始識之既罷居于廬而曹光州演甫以書報其亡臺  
 卿光州之妻黨也

我初未識君人以君為笑垂頭若病鶴煙雨霾七竅弊衣  
 來過我危坐若持釣褚褒乎面新醜蔑一語妙徐徐涉其  
 瀾極望不得微却觀元嫵媚士固難輕料看書眼如月鑄  
 隙靡不照我老多遺忘得君如再少從橫通雜藝甚博且  
 知要所恨言無文至老幽不耀其生世莫識已死誰復弔

東坡詩集 卷之九  
作詩遺故人庶解俗子譙

元脩菜 并錄

菜之美者有吾鄉之巢故人巢元脩嗜之余亦嗜之元脩云使孔北海見當復云吾家菜邪因謂之元脩菜余去鄉十有五年思而不可得元脩適自蜀來見余於黃乃作是詩使歸致其子而種之東坡之下云

彼美君家菜鋪田綠茸茸豆莢圓且小槐芽細而豐種之秋雨餘擢秀繁霜中欲花而未萼一一如青蟲是時青裙女採擷何忽忽烝之復湘之香色蔚其饒點酒下鹽豉縷橙芼薑葱那知雞與豚但恐放箸空春盡苗葉老耕翻煙雨叢潤隨甘澤化暖作青泥始始終不我負力與糞壤同我老忘家舍楚音變兒童此物獨嫵媚終年繫余胃君歸

致其子囊盛勿雨封張騫移首藉適用如葵菘馬援載蔥苡羅生等蒿蓬懸知東坡下瘠鹵化千鍾長使齊安人指此說兩翁

二月三日點燈會客

江上東風浪接天苦寒無賴破春妍試開雲夢羔兒酒快瀉錢塘藥玉船蠶市光陰非故國馬行燈火記當年冷煙濕雪梅花在留得新春作上元

上巳日與二三子攜酒出游隨所見輒作數句明日集之爲詩故詞無倫次

薄雲霏霏不成雨杖藜曉入千花場柯丘海棠吾有詩獨笑深林誰敢侮三杯卯酒人徑醉一枕春睡日亭午竹間老人不讀書留我閉門誰教汝出簷藜枳十圍大寫真素

壁千蛟舞東坡作塘今幾尺攜酒一勞農工苦却尋流水  
出東門壞垣古塹花無主卧開桃李爲誰妍對立鷓鴣相  
媚嫵開餅藉草勸行路不惜春衫汙泥土褰裳共過春草  
亭扣門却入韓家圃轆轤繩斷井深碧鞦韆索挂人何所  
映簾空復小桃枝乞漿不見磨門女南上古臺臨斷岸雪  
陣翻空迷仰俯故人餽我玉葉羹火冷煙消誰爲煮崎嶇  
東蘊下荒徑姪姪隔花間好語更隨落景盡餘樽却傍孤  
城得僧宇主人勸我洗足眠倒牀不復聞鐘鼓明朝門外  
泥一尺始悟三更雨如許平生所向無一遂茲遊何事天  
不阻固知我友不終窮豈弟君子神所予

南堂二首

他時雨夜困移牀坐厭愁聲點客腸一聽南堂新瓦響似  
聞東塢小荷香

山家爲割千房蜜稚子新畦五畝蔬更有南堂堪著客不  
憂門外故人車

次韻孔毅甫久旱已而甚雨三首

飢人忽夢飯甌溢夢中一飽百憂失只知夢飽本來空未  
悟真飢定何物我生無田食破硯爾來硯枯磨不去年  
太歲空在酉傍舍壺漿不容乞今年旱勢復如此歲晚何  
以黔吾突青天蕩蕩呼不聞况欲稽首號泥佛甕中蜴蜥  
尤可笑跂跂脉脉何等秩陰陽有時雨有數民是天民天  
自卹我雖窮苦不如人要亦自是民之一形容可似喪家  
狗未肯弭耳爭投骨倒冠落幘謝朋友獨與蚊雷共圭華  
故人嗔我不開門君視我門誰肯屈可憐明月如潑水夜

半清光翻我室風從南來非雨候且爲疲人洗蒸鬱褰裳  
一和快哉謠未暇飢寒念明日

去年東坡拾瓦礫自種黃桑三百尺今年刈草蓋雪堂日  
炙風吹面如墨平生懶惰今始悔老大勤農天所直沛然  
例賜三尺雨造化無心况難測四方上下同一雲甘澤不  
爲龍所隔俗有分龍日蓬蒿下濕迎曉未燈火新涼催夜織老

夫作罷得甘寢卧聽牆東人響屐奔流未已坑谷平折葦  
枯荷恣漂溺腐儒簾櫺支百年力耕不受衆目憐破陂漏  
水不耐旱人力未至求天全會當作塘徑千步橫斷西北  
遮山泉四鄰相率助舉杵人人知我囊無錢明年共看決  
渠雨飢飽在我寧關天誰能伴我田間飲醉倒惟有支頭  
輓

天公號令不再出十日愁霖併爲一君家有田水冒田我  
家無田憂入室不如西州楊道士萬里隨身惟兩膝沿流  
不惡泝亦佳一葉扁舟任漂突山芎麥麴都不用泥行露  
宿終無疾夜來飢腸如轉雷旅愁非酒不可開楊生自言  
識音律洞簫入手清且哀不須更待秋井榻見人白骨方  
銜杯

初秋寄子由

百川日夜逝物我相隨去惟有宿昔心依然守故處憶在  
遠驛閉門秋暑中藜羹對書史揮汗與子同西風忽淒  
厲萬葉穿戶牖子起尋袂衣感歎執我手朱顏不可恃此  
語君勿疑別離恐不免功名定難期當時已悽斷况此兩  
衰老失塗旣難追學道恨不早買田秋已議築室春當成

雪堂風雨夜已作對牀聲

和秦太虛梅花

西湖處士骨應槁只有此詩君壓倒東坡先生心已灰為  
愛君詩被花惱多情立馬待黃昏殘雪消遲月出早江頭  
千樹春欲闌竹外一枝斜更好孤山山下醉眠處點綴裙  
腰紛不掃萬里春隨逐客來十年花送佳人老去年花開  
我已病今年對花還草草不如風雨卷春歸收拾餘香還  
畀昊

過江夜行武昌山上聞黃州鼓角

清風弄水月銜山幽人夜渡吳王峴黃州鼓角亦多情送  
我南來不辭遠江南又聞出塞曲半雜江聲作悲健誰言  
萬方聲一槩鬪憤龍愁為余變我記江邊枯柳樹未死相

逢真識面他年一葉沂江來還吹此曲相迎餞

將至筠先寄遲适遠三猶子

露宿風餐六百里明朝飲馬南江水未見豐盈犀角兒先  
逢玉雪王郎子時道逢王郎於建昌方北行也對牀欲作連夜語念汝還  
須戴星起夜來夢見小於菟遠小名菟兒猶是髣髴垂兩耳憶  
過濟南春未動三子出迎殘雪裏我時移守古河東酒肉  
淋漓渾舍喜而今憔悴一羸馬逆旅擔夫相汝爾出城見  
我定驚嗟身健窮愁不須耻我為乃翁留十日掣電一歡  
何足恃惟當火急作新詩一醉兩翁勝酒美

別子由兼別遲

知君念我欲別難我今此別非他日風裏楊花雖未定雨  
中荷葉終不濕三年磨我費百書一見何止得雙壁願君

亦莫歎留滯六十小劫風雨疾

岐亭五首

昨日雲陰重東風融雪汁遠林草木暗近舍煙火濕下有  
隱君子嘯歌方自得知我犯寒來呼酒意頗急拊掌動鄰  
里遠村提鵝鴨房櫛鏘器聲蔬果照中幕久聞萋蒿美初  
見新芽赤洗盞酌鵝黃磨刀削熊白須臾我徑醉坐睡落  
巾幘醒時夜向闌唧唧銅餅泣黃州豈云遠但恐朋友缺  
我當安所主君亦無此客朝來靜庵中惟見蜂巒集

我哀籃中蛤閉口護殘汁又哀網中魚開口吐微濕剗腸  
彼交病過分我何得相逢未寒溫相勸此最急不見盧懷  
慎烝壺似烝鴨坐客皆忍笑髡然發其羶不見王武子每  
食刀機赤琉璃載烝豚中有人乳白盧公信寒陋衰髮得

滿幘武子雖豪華未死神已泣先生萬金壁護此一蟻缺  
一年如一夢百歲真過客君無廢此篇嚴詩編杜集

君家蜂作窠歲歲添漆汁我身牛穿鼻卷舌聊自濕二年  
三過君此行真得得愛君似劇孟叩門知緩急家有紅頰  
兒能唱綠頭鴨行當隔簾見花霧輕幕幕爲我取黃封親  
拆官泥赤仍須煩素手自點葉家白樂哉無一事十年不  
著幘閉門弄漆丁哇笑雜呱泣西方正苦戰誰補將帥缺  
披圖見八陣合散更主客不須親戎行坐論教君集

酸酒如蠶湯甜酒如蜜汁三年黃州城飲酒但飲濕我如  
更揀擇一醉豈易得幾息壓茆柴禁網日夜急西鄰推甕  
盎醉倒猪與鴨君家大如掌破屋無遮幕何從得此酒冷  
面妬君赤定應好事人千石供李白爲君三日醉蓬髮不

暇曠夜深欲逾垣卧想春甕泣君奴亦笑我髯齒行禿缺  
三年已四至歲歲遭惡客人生幾兩屐莫厭頻來集

枯松強鑽膏槁竹欲瀝汁兩窮相值遇相哀莫相濕不知  
我與君交遊竟何得心法幸相語頭然未為急願為穿雲  
鵲莫作將雛鴨我行及初夏煮酒映疏幕故鄉在何許西  
望千山赤茲遊定安歸東泛萬頃白一歡寧復再起舞花  
墮憤將行出苦語不用兒女泣吾非固多矣君豈無一缺  
各念別時言閉戶謝眾客空堂淨掃地虛白道所集

龍尾硯歌

并引

余舊作鳳唼石硯銘其略云蘇子一見名鳳唼坐令龍  
尾羞牛後已而求硯於歛歛人云子自有鳳唼何以此  
為蓋不能平也奉議郎方君彥德有龍尾大硯奇甚謂

余若能作詩少解前語者當奉餉乃作此詩

黃琮白琥天不惜顧恐貪夫死懷璧君看龍尾豈石材玉  
德金聲寓於石與天作石來幾時與人作硯初不辭詩成  
鮑謝石何與筆落鍾王硯不知錦茵玉匣俱塵垢擣練支  
牀亦何有况嗔蘇子鳳唼銘戲語相嘲作牛後碧天照水  
風吹雲明窓大几清無塵我生天地一閑物蘇子亦是支  
離人龔言細語都不擇春蚓秋蛇隨意畫願從蘇子老東  
坡仁者不用生分別

豆粥

君不見呼沱流漸車折軸公孫倉皇奉豆粥濕薪破竈自  
燎衣飢寒頓解劉文叔又不見金谷敲冰草木春帳下烹  
煎皆美人萍蓬豆粥不傳法咄嗟而辦石季倫干戈未解



身如寄聲色相纏心已醉身心顛倒自不知更識人間有  
真味豈如江頭千頃雪色蘆茆簷出沒晨煙孤地確舂杭  
光似玉沙餅煮豆軟如酥我老此身無着處賣書來問東  
家住卧聽雞鳴粥熟時蓬頭曳履君家去

秦少游夢發殯而葬之者云是劉發之柩是歲發首

薦秦以詩賀之劉涇亦作因次其韻

君看三代士執雉本以殺身為小補居官死職戰死綬夢  
尸得官真古語五行勝已斯為官官如草木吾如土仕而  
未祿猶賓客待以純臣蓋非古餽焉曰獻稱寡君豈比公  
卿相爾汝世衰道微士失已得喪悲懽反其故草袍蘆箬  
相嫵媚飲食嬉游事羣聚曲江舫舫月燈毬是謂舞殯而  
歌墓看花走馬到東野餘子紛紛何足數二生年少兩豪

逸詩酒不知軒冕苦故令將仕夢發棺勸子勿為官所腐  
塗車芻靈皆假設著眼細看君勿誤時來聊徇一飛鳴進  
隱不須煩伍舉

金山夢中作

江東賈客木絲裘會散金山月滿樓夜半潮來風又熟卧  
吹簫管到揚州

徐大正閑軒

冰蠶不知寒火鼠不知暑知閑見閑地已覺非閑侶君看  
東坡翁懶散誰比數形骸墮醉夢生事委塵土早眠不見  
燈晚食或欺午卧看甕取盜坐視麥漂雨語希舌頰強行  
少腰脚樓五年黃州城不踏黃州鼓人言我閑客置此閑  
處所問閑作何味如眼不自覩頗訝徐孝廉得閑能幾許

介子願奉使翁歸備文武應緣不耐閑名字挂庭宇我詩  
為閑作更得不閑語君如汗血駒轉盼略燕楚莫嫌鑿輅  
重終勝鹽車苦

次韻王定國南遷回見寄

土暈銅花蝕秋水要須悍石相龔砥十年冰蘖戰膏梁萬  
里煙波濯紈綺歸來詩息轉清激百丈空潭數魴鯉逝將  
桂浦擷蘭蓀不記槐堂收劔履却息庾嶺今何在史說彭  
城真夢耳宋詩述彭城舊遊君知先竭是甘井我願得全如苦李  
妄心不復九回腸至道終當三洗髓廣陵陽羨何足較只  
有無何真我里余買田陽羨來詩以為不如廣陵樂全老子今禪伯張安道也  
定國掣電機鋒不容擬心適豈復問去何印可柳須答如  
是相逢為我話留滯桃花春漲孤舟起

泗州南山監倉蕭淵東軒二首

偶隨樵父採都梁南山名都梁山山出都梁香故也竹屋松扉試乞漿但  
見東軒堪隱几不知公子是監倉溪中亂石墻垣古山下  
寒蔬七箸香我是江南舊遊客挂冠知有老蕭郎  
北望飛塵苦晝霾洗心聊復寄東齋珍禽聲好猶思越野  
橘香清未過淮有信微泉來遠嶺無心明月轉空堦一官  
倉庾真堪老坐看松根絡斷崖

泗州除夜雪中黃師是送酥酒

暮雪紛紛投碎米春流咽咽走黃沙舊遊似夢徒能說逐  
客如僧豈有家冷硯欲書先自凍孤燈何事獨成花使君  
半夜分酥酒驚起妻孥一笑譁

正月一日雪中過淮謁客回作

更定詩少

東坡詩集 五十七  
攢眉有底恨得句不妨清霽霧開寒谷飢鴉舞雪城橋聲  
春市散塔影莫淮平不用殘燈火船窓夜自明

孫莘老寄墨四首

徂徠無老松易水無良工珍材取樂浪妙手惟潘翁潘翁作墨

難用高麗煤魚胞熟萬杵犀角盤雙龍墨成不敢用進入蓬萊

宮蓬萊春晝永三殿明房櫳金箋灑飛白瑞霧縈長虹遙  
憐醉常待一笑開天容

谿石琢馬肝刻藤開玉版噓噓雲霧出奕奕龍蛇結此中  
有何好秀色紛滿眼故人歸天祿古漆窺蠹簡階麋給尚  
方老手擅編刻分餘幸見及流落一歎赦

我貧如飢鼠長夜空敲齧瓦池研竈煉葦管書柿葉近者

唐夫子遠致烏玉玦唐林夫寄張先生又繼之圭壁爛箱

篋清窓洗硯坐蚶蛭稍蟠結便有好事人敲門求醉帖

吾窮本坐詩久服朋友戒五年江湖上開口洗殘債今來  
復稍稍快癢如爬疥先生不譏訶又復寄詩械幽光發奇  
息黥黥出荒怪詩成一自笑故疾逢鰕蟹

和人見贈

只寫東坡不著名此身已是一長亭壯心無復春流起衰  
鬢從交病葉零知有雪兒供筆硯應嗤竈婦洗盆餅回來  
索酒公應厭京口新傳作客經

寄蘄簞與蒲傳正

蘭溪美箭不成笛離離玉筋排霜脊千溝萬縷自生風入  
手未開先慘慄公家列屋閑蛾眉珠簾不動花陰移霧帳  
銀牀初破睡牙籤玉局坐彈碁東坡病瘦長羈旅凍卧飢

吟似飢鼠倚賴春風洗破衾一夜雪寒披故絮火冷燈青  
誰復知孤舟兒女自憂嗔皇天何時反炎燠愧此八尺黃  
琉璃願公淨掃清香閣卧聽風漪聲滿榻習習還從兩腋  
生請公乘此朝闈闕

贈眼醫王生彥若

鍼頭如麥芒氣出如車軸間關絡脉中性命寄毫粟而况  
清淨眼內景含天燭琉璃貯沆瀣輕脆不任觸而子於其  
間來往施鋒鏃笑談紛自若觀者頸爲縮運鍼如運斤去  
翳如拆屋常疑子善幻他技雜符祝子言吾有道此理君  
未矚形骸一塵垢貴賤兩草木世人方重外妄見瓦與玉  
而我初不知刺眼如刺肉君看目與翳是翳要非目目翳  
苟二物易分如麥菽寧聞老農夫去草更傷穀鼻端有餘

地肝膽分楚蜀吾於五輪間蕩蕩見空曲如行九軌道並  
驅無擊轂空花誰開落明月自臄胸請問樂全堂忘年老  
尊宿

彥若樂全先生門下醫也

贈葛葦

竹椽茆屋半摧頽宥向蜂窠寄此生長恐波頭卷室去欲  
將船尾載君行小詩試擬孟東野大草閑臨張伯英消遣  
百年須底物故應憐我不歸耕

海市

并敘

予聞登州海市舊矣父老云常出於春夏今歲晚不復  
見矣予到官五日而去以不見爲恨禱於海神廣德王  
之廟明日見焉乃作此詩

東方雲海空復空羣仙出沒空明中蕩搖浮世生萬象豈

有貝闕藏珠宮心知所見嗜幻影敢以耳目煩神工歲寒  
水冷天地閉爲我起螫鞭魚龍重樓翠阜出霜曉異事驚  
倒百歲翁人間所得容力取世外無物誰爲雄率然有請  
不我拒信我人厄非天窮潮陽太守南遷歸喜見石廩堆  
祝融自言正直動山鬼豈知造物哀龍鍾信眉一笑豈易  
得神之報汝亦已豐斜陽萬里孤鳥沒但見碧海磨青銅  
新詩綺語亦安用相與變滅隨東風

次韻王定國得穎倅

滔滔四海我知津每愧先生值杖芸自少多言晚聞道從  
今閉口不論文灑翻白獸樽中酒歸煮青泥坊底芹要識  
老僧無盡處牀前牛蟻不曾聞

次韻王震

攜文過我治平間霧豹當時始一斑聞道吹噓借餘論故  
教流落得生還清篇帶月來霜夜妙語先春發病顏詩酒  
暮年猶足用竹林高會許時攀

惠崇春江曉景

竹外桃花三兩枝春江水暖鴨先知萋蒿滿地蘆芽短正  
是河豚欲上時

送戴蒙赴成都玉局觀將老焉

拾遺被酒行歌處野梅官柳西郊路聞道華陽版籍中至  
今尚有城南杜我欲歸尋萬里橋水花風葉暮蕭蕭芋魁  
徑尺誰能盡橙木三年已足燒百歲風狂定何有羨君今  
作義眉叟縱未家生執戟郎也應世出埋輪守莫欺老病  
未歸身玉局他年第幾人會待子猷清興發還須雪夜去

尋君

送陳睦知潭州

華清縹渺浮高棟上有纈林藏石甕一杯此地初識君千巖夜土同飛鞚君時年少面如玉一飲百觚嫌未痛白鹿泉頭山月出寒光潑眼如流汞朝元閣上酒醒時卧聽風鸞鳴鐵鳳舊遊空在人何處二十三年真一夢我得生還雪鬢滿君亦老嫌金帶重有如社燕與秋鴻相逢未穩還相送洞庭青草渺無際天柱紫蓋森欲動湖南萬古一長嗟付與騷人發嘲弄

送賈訥倅眉

老翁山下玉淵回手植青松三萬栽父老得書知我在小軒臨水為君開試看一一龍蛇活更聽蕭蕭風雨哀便與

甘棠同不翦蒼髯白甲待歸來

先君墓于慕頤山之東二十餘里地名老翁泉君詩為一往感歎之深故反

杜介送魚

新年已賜黃封酒舊老仍分頰尾魚陋巷關門負朝日小園除雪得春蔬病妻起斫銀絲膾稚子謹尋尺素書醉眼矇矓覓歸路松江煙雨晚疎疎

武昌西山

并敘

嘉祐中翰林學士承旨鄧公聖求為武昌令常遊寒溪西山山中人至今能言之軾謫居黃岡與武昌相望亦常往來溪山間元祐元年十一月二十九日考試館職與聖求會宿玉堂偶語舊事聖求嘗作元次山窪樽銘刻之巖石因為此詩請聖求同賦當以遺邑人使刻之

銘側

春江淥漲蒲萄醅武昌官柳知誰栽憶從樊口載春酒步  
上西山尋野梅西山一上十五里風駕兩掖飛崔嵬同遊  
困卧九曲嶺褰衣獨到吳王臺中原北望在何許但見落  
日低黃埃歸來解劔亭前路蒼崖半入雲濤堆浪翁醉處  
今尚在石臼杯飲無樽壘爾來古意誰復嗣公有妙語留  
山隈至今好事除草棘常恐野火燒蒼苔當時相望不可  
見玉堂正對金鑾開豈知白首同夜直卧看椽燭高花摧  
江邊曉夢忽驚斷銅環玉鎖鳴春雷山人帳空猿鶴怨江  
湖水生鴻雁來請公作詩寄父老往和萬谿松風哀

次韻劉貢父獨直省中

明窓畏日曉先噉高柳鳴蜩午更喧筆老新詩疑有物心  
空客疾本無根隔牆我亦眠風榻上馬君洗瑣月軒共喜  
早歸三伏近解衣盤礴亦君恩

書李世南所畫秋景

野水參差落漲痕疎林欹倒出霜根扁舟一棹歸何處家  
在江南黃葉村  
人間斤斧日創夷誰見龍蛇百尺姿不是溪山曾獨往何  
人解作挂猿枝

和子由除夜元日省宿致齋二首

江淮流落豈關天禁省相望亦偶然等是新年未相見此  
身應坐不歸田  
當年踏月走東風坐看春闈鎖醉翁白髮門生幾人在却  
將新句調兒童

慶源宣義王丈以累舉得官爲洪雅主簿雅州戶掾  
遇吏民如家人人安樂之旣謝事居眉之青神瑞  
草橋放懷自得有書來求紅帶旣以遺之且作詩  
爲戲請黃魯直學士秦少游賢良各爲賦一首爲

老人光華

青衫半作霜葉枯遇民如兒吏如奴吏民莫作官長看我  
是識字耕田夫妻啼兒號刺史怒時有野人來挽鬚拂衣  
自注下下考芋魁飯豆吾豈無歸來瑞草橋邊路獨遊還  
佩平生壺慈母巖前自喚渡青衣江上人爭扶今年蠶市  
數州集中有遺民懷袴儒邑中之黔相指似白髯紅帶老  
不癯我欲西歸卜鄰舍隔墻拊掌容歌呼不學山王乘駟  
馬回頭空指黃公墟

書林次中所得李伯時歸去來陽關二圖後二首

不見何堪唱渭城舊人空數米嘉榮龍眠獨識慙處畫  
出陽關意外聲

兩本新圖寶墨香樽前獨唱小秦王爲君翻竹歸來引不  
學陽關空斷腸

次前韻再送周正孺

東川得望郎坐與西爭重高風傾石室舊學鄙文冢蜀人  
安使君所至野不聳竹馬迎細侯大錢送劉寵遙知句谿  
路老穉相扶擁看畫古叢祠百怪朝幽棋牛頭與兜率雲  
木蔚堆瓏醉鄉追舊遊筆陣賈餘勇聊將詩酒樂一掃簿  
書冗西風吹好句珠玉本無踵

劉蛻文冢銘在梓州

書王定國所藏烟江疊嶂圖

王晉卿畫



江上愁心千疊山浮空積翠如雲煙山耶雲耶遠莫知煙  
空雲散山依然但見兩崖蒼蒼暗絕谷中有百道飛來泉  
縈林絡石隱復見下赴谷口爲奔川川平山開林麓斷小  
橋野店依山前行入稍渡喬木外漁舟一葉江吞天使君  
何從得此本點綴毫末分清妍不知人間何處有此境徑  
欲往置二頃田君不見武昌樊口幽絕處東坡先生留五  
年春風搖江天漠漠暮雲卷雨山娟娟丹楓翻鴉伴水宿  
長松落雪驚醉眠桃花流水在人世武陵豈必皆神仙江  
上清空我塵土雖有去路尋無緣還君此畫三歎息山中  
故人應有招我歸來篇

六年正月二十日復出東門仍用前韻

亂山環合水侵門身在淮南盡處村五畝漸成終老計九

重新掃舊巢痕豈惟見慣沙鷗熟已覺來多釣石溫長與  
東風約今日暗香先返玉梅魂

興龍節侍宴前一日微雪與子由同訪王定國小飲

清虛堂定國出數詩皆佳而五言尤奇子由又言  
昔與孫巨源同過定國感念存沒悲歎久之夜歸  
稍醒各賦一篇明日朝中以示定國也

天風淅淅飛玉沙詔恩歸沐休早衙遙知清虛堂裏雪正  
似蒼筤林中花出門自笑無所詣呼酒持勸惟君家踏冰  
凌兢戰疲馬扣門剝啄驚寒鴉羨君五字入詩律欲與六  
出爭天葩頭風已倩檄手愈背癢恰得仙爪爬銀餅瀉油  
浮蟻酒紫盃鋪粟盤龍茶幅巾起作鴈鴒舞疊鼓誰摻漁  
陽槌九衢燈火雜夢寐十年聚散空咨嗟明朝握手殿門

外共看銀闕瞰晨霞

王晉卿作煙江疊嶂圖僕賦詩十四韻晉卿和之語特奇麗因復次韻不獨紀其詩畫之美亦為道其出處契濶之故而終之以不忘在莒之戒亦朋友忠愛之義也

山中舉頭望日邊長安不見空雲烟歸來長安望山上時移事改應潸然管絃去盡賓客散惟有馬埒編金泉渥洼故自千里足要飽風雪輕山川屈居華屋嚼棗脯十年俯仰龍旂前却因病瘦出奇骨臨車之厄寧非天風流文采磨不盡水墨自與詩爭妍畫山何必山中人田歌自古非知田鄭虔三絕君有二筆勢挽回三百年欲將巖谷亂窈窕眉峰脩嫵誇連娟人間何有春一夢此身將老蠶三眠

山中幽絕不可久要作平地家居仙能令水石長在眼非君好我當誰緣願君終不忘在莒樂時更賦囚山篇柳子厚有囚山賦

夜直玉堂攜李之儀端叔詩百餘首讀至夜半書其後

玉堂清冷不成眠伴直難呼孟浩然暫借好詩消永夜每逢佳處輒忝禪愁侵硯滴初含凍喜入燈花欲鬪妍寄語君家小兒子他時此句一時編

再和劉貢父春日賜幡勝

與君流落偶還朝過眼紛綸七葉貂莫笑華顛飄彩勝幾人黃壤隔青霄行吟未許窮騷雅坐嘯猶能出教條記取明年江上郡五更春枕夢春韶

去杭十五年復遊西湖用歐陽察判韻

我識南屏金鯽魚重來拊檻散齋餘還從舊社得心印似  
省前生覓手書葑合平湖久蕪漫人經豐歲尚凋疎誰憐  
寂寞高常侍老去狂歌憶孟諸

與莫同年雨中飲湖上

到處相逢是偶然夢中相對各華顛還來一醉西湖雨不  
見跳珠十五年

座上借韻送竒嵐軍通判葉朝奉

雲間踏白看纒旗莫忘西湖把酒時夢裏吳山連越嶠樽  
前羗婦雜胡兒夕烽過後人初醉春鴈來時雪未滋爲問  
從軍真樂否書來粗遣故人知

次韻詹適宣德小飲吳亭

君方夢謫仙來詩記李  
白郎官湖我亦弔文園江上同三黜天涯又  
一樽濤雷殷白晝梅雪耿黃昏歸去多情雨應隨御史軒  
詹爲御史主簿

東川清絲寄魯冀州戲贈

鵝溪清絲清如冰上有千歲交枝藤藤生谷底飽風雪歲  
晚忽作龍虵升嗟我雖爲老侍從骨寒只愛布與繒牀頭  
錦衾未還客坐覺芒刺在背膺豈如髯卿晚乃貴福祿正  
似川方增醉中倒着紫綺裘下有半臂出縹綾封題不敢  
妄裁剪刀尺自有佳人能遙知千騎出清曉積雪未放游  
塵興白須紅帶柳絲下老弱空巷人相登但放奇紋出領  
袖吾髯雖老無人憎

次韻劉景文周次元寒食同游西湖

絮飛春減不成年老境同乘下瀨船藍尾忽驚新火後寒食詩云三盃盞尾酒一碟膠牙餠遊頭要及浣花前成都太守自正月二十九日出遊至四月十九日浣花山西老將詩無敵洛下書生語更妍共向北山尋  
二士畫橈鼉鼓聒清眠

次韻林子中王彥祖唱酬

早知身寄一漚中晚節尤驚落木風近聞莘老公澤皆逝故有此句昨夢已論三世事歲寒猶喜五人同軾與子中彥祖子敦完大雨餘北固山圍座春盡西湖水映空差勝四明狂監在更將老眼犯塵紅

次韻曹輔寄壑源試焙新芽

仙山靈雨濕行雲洗遍香肌粉未勻明日來投玉川子清風吹破武林春要知玉雪心腸好不是膏油首面新戲作小詩君一笑從來佳茗似佳人

次韻劉景文登介亭

澤國梅雨餘衰年困烝溽高堂磨新塼頗覺利腰足松根百尺井兩綆飛淨淥流觴聚兒童一笑爲捧腹清風信可馭剛氣在巖麓始知其此世物外無三伏長歌入雲去不待絃管逐西湖真西子煙樹點眉目濤江少醞藉高浪翻雪屋俛仰拊四海百世飛鳥速遠追錢氏餘近弔祖侯躅吾生如寄耳寸晷輕尺玉誰似劉將軍逸韻謝邊幅千言一揮手五車不再讀春巖彩雞舞月峽哀猿哭朝先啼鳩起莫與寒蠶續我老廢吟哦賴君時擊觸從今事遠覽發軔此幽谷清遊得三昧至樂謝五欲莫作狂道士氣壓劉師服

次韻蘇伯固主簿重九

雲間朱袖拂雲和知是長松挂女蘿髻重不嫌黃菊滿手  
香新喜綠橙搓墨翻衫袖吾方醉紙落雲煙子患多只有  
黃鷄與白髮玲瓏應識使君歌

再和楊公濟梅花

人去殘英滿酒樽不堪細雨濕黃昏夜寒那得穿花蝶知  
是風流楚客魂

北客南來豈是家醉看參月半橫斜他年欲識吳姬面  
燭三更對此花

予去杭十六年而復來留二年而去平生自覺出處幾  
老少粗似樂天雖才名相遠而安分寡求亦庶幾  
焉三月六日來別南北山諸道人與下天竺惠

師話舊

當年衫鬢兩青青強說重臨慰別情衰髮祇今無可白故  
應相對話來生

元祐六年六月自杭州召還汝公館我於東堂閱舊

詩卷次諸公韻二首

半熟黃粱日未斜玉堂陰合手栽花却尋三十年前味  
飯鐘聲已飯茶

尺一東來喚我歸衰年已迫故山期文章曹植今堪笑却  
卷波瀾入小詩

次韻劉景文見寄

淮上東來雙鯉魚巧將書信渡江湖細看落墨皆松瘦想  
見掀髯正鶴孤烈士家風安用此書生習氣未能無莫因

老驥息千里醉後哀歌缺唾壺

歐季默以油煙墨二丸見餉各長寸許戲作小詩  
書窓拾輕煤拂帳掃餘馥辛勤破千夜收此一寸玉癡人  
畏老死腐朽同草木欲將東山松湮盡南山竹墨堅人苦  
脆未用歎不足且當注蟲魚莫草三千牘

聚星堂雪

并敘

元祐六年十一月一日禱雨張龍公得小雪與客會飲  
聚星堂忽憶歐陽文忠公作守時雪中約客賦詩禁體  
物語於艱難中特出奇麗爾來四十餘年莫有繼者僕  
以老門生繼公後雖不足追配先生而賓客之美殆不  
減當時公之二子又適在郡故輒舉前令各賦一篇以  
爲汝南故事云

窓前暗響鳴枯葉龍公試手行初雪映空先集疑有  
態斜飛正愁絕衆賓起舞風竹亂老守先醉霜松折恨無  
翠袖點橫斜祇有微燈照明滅歸來尚喜更鼓永晨起不  
待鈴索掣未嫌長夜作衣稜却怕初陽生眼纔欲浮大白  
追餘賞幸有回飈驚落屑模糊檜頂獨多時歷亂瓦溝裁  
一瞥汝南先賢有故事醉翁詩話誰續說當時號令君聽  
取百戰不許持寸鐵

喜劉景文至

天明小兒便傳呼鬣劉已到城南隅尺書真是鬣手迹起  
坐鬣眼知有無今人不作古人事今世有此古丈夫我聞  
其來喜欲舞病自能起不用扶江淮早久塵土惡朝來清  
雨濯鬣鬚相看握手了無事千里一笑無乃迂平生所樂

在吳會老死欲葬杭與蘇過江西來二百日冷落山水愁  
吳姝新堤舊井各無恙參寥六一豈念吾別後新詩巧摹  
寫袖中知有錢塘湖

和劉景文見贈

元龍本志陋曹吳豪氣崢嶸老不除失路今為噲等伍作  
詩猶似建安初西來為我風鰲面獨卧無人雪編廬留子  
非為十日飲要令安世誦亡書

次前韻送劉景文

白雲在天不可呼明月豈肯留庭隅怪君西行八百里清

坐十日一事無路人不識呼尚書但見凜凜雄千夫君一

僕率然相訪逆旅多呼尚書適爾君都頭也豈知入骨愛詩酒醉倒正欲蛾眉

扶一篇向人寫肝肺四海知我霜鬢鬚君前有詩見寄云

重陽曾補歐陽趙陳皆有豈謂夫子駕復迂爾來又見

三黜柳共此暖熱餐擅蘇酒殺酸薄紅粉暗祗有穎水清

而妹一朝寂寞風雨散對影誰念月與吾郡中日與歐陽

履常相從而景文復至不數日柳戒之亦見過賓客何時

歸帆沂江水春酒一變甘棠湖景文近卜居九江近甘棠

新渡寺席上次趙景貺陳履常韻送歐陽叔弼比來

諸君唱和叔弼但袖手旁睨而已臨別忽出一篇

頗有淵明風致坐皆驚歎

神屠不目全妙類惟粧半更刀乃族庖倚市必醜悍平生

魏公籌忽斲郢人墁詩書亦何用適道須此館多言雖數

窮微中或排難子詩如清風寥寥發將旦胡為久閉匿綺

語真自患許時笑我癡隔屋相咏歎竟識彥道否絕叫呼

百萬清朝固多士入門子皆冠莫言清潁水從此隔河漢  
異時我獨來得魚楊柳貫持歸不忍食尺素解悽斷中有  
清圓句銅丸飛柘彈春愁結凌澌正待一笑泮百篇儻寄  
我呻吟鄭人緩

次韻趙景貺春思且懷吳越山水

歲華來無窮老眼久已靜春風如繫馬未動意先騁西湖  
忽破碎鳥落魚動鏡縈城理枯瀆放開起膠艇願君營此  
樂官事何時竟清河西湖三開賢君成之思吳信偶然出處付前定飄  
然不繫舟乘此無盡興醉翁行樂處草木皆可敬明朝遊  
北渚急掃黃葉徑白酒真到齊紅裙已放鄭酒尚有香泉一壺爲樂全先生服不作藥也

和陳傳道雪中觀燈

新年樂事歎何曾閉閣燒香一病僧未忍便傾澆別酒且  
來同看照愁燈潁魚躍處新亭近湖雪消時畫舫升祗恐  
樽前無此客清詩還有士龍能

病中夜讀朱博士詩

病眼亂燈火細書數塵沙君詩如秋露淨我空中花古語  
多妙寄可識不可誇巧笑在頰頰哀音餘摻搗曾坑一掬  
春紫餅供千家懸知貴公子眼無真茶崎嶇爛石上得此一寸芽緘封勿浪出湯老客未嘉

送晁美叔

我年二十無朋儔當時四海一子由君來扣門如有求願  
然病鶴清而脩醉翁遣我從子游翁如退之蹈軻丘尚欲  
放予出一頭嘉祐初軾與子由寓興國浴室美叔忽見訪云君從歐陽公游久矣公令我來與子定交



謂子必名世老夫亦須放他出一頭地酒醒夢斷四十秋病鶴不病骨愈蚌惟有我顏老可羞醉翁賓客散九州幾人白髮還相收我如懷祖拙自謀正作尚書已過優君求會稽寔良籌往看萬壑爭交流君近乞越州

僕所藏仇池石希代之寶也王晉卿以小詩借觀意在於奪僕不敢不借然以此詩先之

海石來珠宮秀色如蛾綠坡陀尺寸間宛轉陵巒足連娟

二華頂空洞三茆腹初疑仇池化又恐瀛洲蹙慙嶠南

使餽餉淮東牧僕在揚州程德孺由南解官以此石見遺得之喜無寐與汝

交不瀆盛以高麗盆藉以文登玉附其足幽光先五夜冷氣壓三伏老

卜一夫幸可致千里還相逐風流貴公子竄謫武當谷見

山應已厭何事奪所欲欲留嗟趙弱寧許負秦曲傳觀慎勿許間道歸更速

王晉卿示詩欲奪海石錢穆父王仲至蔣穎叔皆次韻穆至二公以為不可許獨穎叔不然今日穎叔

見訪親覩此石之妙遂悔前語軾以謂晉卿豈可終閉不予者若能以韓幹二散馬易之者蓋可許也復次前韻

相如有家山縹渺在眉綠誰云千里遠寄此一顰足平生

錦繡腸蚤歲藜莧腹從教四壁空未遣兩峰蹙吾今况衰

病義不忘樵牧逝將仇池石歸岷山瀆守子不貪寶完

我無瑕玉故人詩相戒妙語予所伏一篇獨異論三占從

兩卜君家畫可數天驥紛相逐風驟掠原野電尾梢澗谷

東坡詩集 卷之七十一  
君如許相易是亦我所欲今朝安西守來聽陽關曲勸我  
留此峰他日來不速

軾欲以石易畫晉卿難之穆父欲兼取二物頴叔欲  
焚畫碎石乃復次前韻并解三詩之意

春冰無真堅露葉失故綠鷄疑鵬萬里眩笑夔一足二豪  
爭穰袂先生一捧腹明鏡既無臺淨瓶何用甕古甕通盆山  
不可隱畫馬無由牧聊將置庭宇何必棄溝瀆焚寶真愛  
寶碎玉未忘玉久知公子賢出語者年伏欲觀博物妙故  
以求馬卜維摩既復捨天女還相逐授之無盡燈照此久  
幽谷定心無一物法樂勝五欲三峨吾鄉井萬里君部曲  
卧雲行歸休破賊見神速晉卿將種常有此志

上元侍飲樓上二首呈同列

薄雪初消野未耕賣薪買酒看升平吾君勤儉倡優拙自  
是豐年有笑聲

老病行穿萬馬羣九衢人散月紛紛歸來一點殘燈在猶  
有傳柑遺細君侍飲樓上則貴戚爭以黃柑遺近臣謂之

七年九月自廣陵召還復館于浴室東堂八年六月  
乞會稽將去汝公乞詩乃復用前韻

乞郡三章字半斜廟堂傳笑眼昏花上人問我遲留意待  
賜頭綱八餅茶尚書學士得賜頭綱龍茶一斤八餅今年

夢遶吳山却月廊白梅盧橘覺猶香杭州梵天寺有月廊  
盧會稽且作須臾意從此歸田策最良

東南此去幾時歸倦鳥孤雲豈有期斷送一生消底物三  
年光景六篇詩

寄館合刷餅與子由

老人心事日摧頹宿火通紅手自焙小甌短餅良具足釋  
兒嬌女共燔煨寄君東閣閑烝栗知我空堂坐畫灰約束  
家僮好收拾故山梨棗待翁來

次韻劉濤撫寄蜜清荔枝

時新滿座聞名字別久何人記色香禁似楊梅烝霧雨花  
如盧橘傲風霜每憐尊菜下鹽豉官與蒲萄壓酒漿回首  
驚塵卷飛雲詩情真合與君嘗

子由生日以檀香觀音像及新合印香銀篆槃爲壽  
旃檀婆律海外芬西山老臍栢所薰香螺脫鱗來相羣能  
結縹眇風中雲一燈如螢起微焚何時度盡繆篆紋繚繞  
無窮合復分綿綿浮空散氤氳東坡詩是壽卯君君少與

我師皇墳旁資老聃釋迦文共厄中年黠蠅蚊晚遇斯須  
何足云君方論道承華勗我亦旗鼓嚴中軍國恩當報敢  
不勤但願不爲世所醺爾來白髮不可耘問君何時返鄉  
枌收拾散亡理放紛此心實與香俱惹聞息大士應已聞

次韻李端叔謝送牛醃鴛鴦竹石圖

聞君談西 廢食忘蚤晚王師本不陣賊壘何足剗守邊  
在得士此語要而簡知君論將口似我識畫眼笑指塵壁  
間此是老牛馘平生師衛玠非意常理遣訴君定何人未  
用市朝顯置之勿復道世俗固多舛歸去亦何須單車渡  
殺灑如蟲得羽化已脫安用蠶家書空萬軸涼曝困舒卷  
念當掃長物閉息默自煖此畫聊付君幽處得小展新詩  
勿縱筆羣吠驚邑犬時來未可知妙斷待輪扁

過湯陰市得豌豆大麥粥示三兒子

朔野方赤地河濡但黃塵秋霖暗豆漆夏旱耀麥人逆旅  
唱晨粥行庖得時珍青班照七筋脆響鳴牙齦玉食謝故  
吏風餐便逐臣漂零竟何適浩蕩寄此身爭勸加飲食實  
無負吏民何當萬里客歸及三年新

子由新脩汝州龍興寺吳畫壁

丹青久衰工不秣人物尤難到今世每摹市井作公卿畫  
手懸知是徒隸吳生已與不傳死那復典刑留近歲人間  
幾處變西方盡作波濤翻濺勢細觀手面分轉側妙算毫  
釐得天契始知真放本精微不比狂花生客慧似聞遺墨  
留汝海古壁蝸涎可垂涕力捐金帛扶棟宇錯落浮雲卷  
新霽使君坐歎清夢餘幾疊衣紋數襟袂他年弔古知有

人姓名聊記東坡弟

慈湖夾阻風三首

此生歸路愈茫然無數青山水拍天猶有小船來賣餅喜  
聞墟落在山前

我行都是退之詩真有人家水半扉千頃桑麻在船底空  
餘石髮挂魚衣

卧看落月橫千丈起喚清風得半帆且並水村欹側過人  
間何處不巉巖

秧馬歌并引

過廬陵見宣德郎致仕曾君安止所出作禾譜文既溫  
雅事亦詳實惜其有所缺不譜農器也予昔遊武昌見  
農夫皆騎秧馬以榆棗爲腹欲其滑以楸桐爲背欲其

東坡詩金 七十五  
輕腹如小舟昂其首尾背如覆瓦以便兩髀雀躍于泥  
中繫束藁其首以縛秧日行千畦較之偃僂而作者勞  
佚相絕矣史記禹乘四載泥行乘橇解者曰橇形如箕  
摘行泥上豈秧馬之類乎作秧馬歌一首附于禾譜之  
末云

春雲濛濛雨淒淒春秋欲老翠剡齊嗟我婦子行水泥朝  
分一壠暮千畦腰如筮篲首啄雞筋煩骨殆聲酸嘶我有  
桐馬手自提頭尻軒昂腹脇低背如覆瓦去角圭以我兩  
足爲四蹄聳踊滑汰如鳧鷖纖纖束藁亦可齎何用繁纓  
與月題榻從哇東走哇西山城欲閉聞鼓鼙忽作的盧躍  
檀溪歸來挂壁從高栖了無芻秣飢不啼少壯騎汝逮老  
驚何曾蹶軼防顛擠錦韉公子朝金闈笑我一生羈牛犁  
不知自有木馱騃

八月七月初入贛過惶恐灘

七千里外二毛人十八灘頭一葉身山憶喜歡勞遠夢蜀道  
有錯喜歡鋪地名惶恐泣孤臣長風送客添帆腹積雨扶  
在大散關上舟減石鱗便合與官充水手此生何止略知津

天竺寺并引

予年十二先君自虔州歸爲予言近城山中天竺寺有  
樂天親書詩云一山門作兩山門兩寺元從一寺分東  
澗水流西澗水南山雲起北山雲前臺花發後臺見上  
界鐘清下界聞遙想吾師行道處天香桂子落紛紛筆  
勢奇逸墨迹如新今四十七年矣予來訪之則詩已亡  
有刻石存耳感涕不已而作是詩

香山居士留遺迹天竺禪師有故家空咏連珠吟疊壁已  
亡飛鳥失驚蛇林深野桂寒無子雨浥山薑病有花四十  
七年真一夢天涯流落涕橫斜

舟行至清遠縣見顧秀才極談惠州風物之美

到處聚觀香案吏此邦宜着玉堂仙江雲漠漠桂花濕海  
雨悠悠荔子然聞道黃柑常抵鵲不容朱橘更論錢恰從  
神虎來弘景便向羅浮見稚川

廣州蒲閭寺

地產菖蒲十二節相傳安期生之故居  
始皇訪之於此

不用山僧導我前自尋雲外出山泉千章古木臨無地百  
尺飛濤瀉漏天舊日菖蒲方士宅後來薈蔔祖師禪而今  
祇有花含笑笑道秦皇欲學仙

山中多含笑花

朝雲詩

并引

世謂樂天有粥駱馬放楊柳枝詞嘉其主老病不忍去  
也然夢得有詩云春盡絮飛留不得隨風好去落誰家  
樂天亦云病與樂天相伴住春隨樊子一時歸則是樊  
素竟去也予家有數妾四五年相繼辭去獨朝雲者隨  
予南遷因讀樂天集戲作此詩朝雲姓王氏錢塘人嘗  
有子曰幹兒未替而夭云

不似楊枝別樂天恰如通德伴伶玄阿奴絡秀不同老夫  
女維摩總解禪經卷藥爐新活計舞衫歌扇舊因緣丹成  
逐我三山去不作巫陽雲雨仙

十一月二十六日松風亭下梅花盛開

春風嶺上淮南村昔年梅華曾斷魂

予昔赴黃州春風嶺  
上見梅花有兩絕句

明年正月往坡亭道中賦詩云去  
年今日開山路細雨梅花正斷魂

豈知流落復相見蠻風

颯雨愁黃昏長條半落荔支浦卧樹獨秀桄榔園豈惟幽  
光留夜色直恐冷艷排冬溫松風亭下荆棘裏兩株玉蕊  
明朝瞰海南仙雲嬌墮砌月下縞衣來扣門酒醒夢覺起  
繞樹妙意有在終無言先生獨飲勿歎息幸有落月窺清  
樽

再用前韻

羅浮山下梅花村玉雪為骨冰為魂紛紛初疑月挂樹耿  
耿獨與參橫昏先生索居江海上悄如病鶴栖荒園天香  
國艷官相顧知我酒熟詩清溫蓬萊宮中花鳥使綠衣倒  
挂扶桑瞰抱叢窺我方醉卧故遣啄木先敲門麻姑過君  
急洒掃鳥能歌舞花能言酒醒人散山寂寂惟有落蓋粘  
空樽嶺南珍禽有倒挂子綠毛紅象如鸚鵡而小自海東  
來非塵埃間物也

新釀桂酒

擣香篩辣入餅益盎盎春溪帶雨渾收拾小山藏社甕招  
呼明月到芳樽酒材已遣門生致菜把仍叨地主恩爛煮  
葵羹斟桂醕風流可惜在蠻村

花落復次前韻

玉妃謫墮煙雨村先生作詩與招魂人間草木非我對奔  
月偶挂成幽昏闔香入戶尋短夢青子綴枝留小園披衣  
連夜喚客飲雪膚滿地聊相溫松明照坐愁不睡井花入  
腹清而瞰先生年來六十化道眼已入不二門多情好事  
真習氣惜花未忍終無言留連一物吾過矣笑領百罰空  
罍樽

詹守攜酒見過用前韻作詩聊復和之

箕踞狂歌老瓦盆  
燎毛燔肉似羗渾  
傳呼草市來攜客  
洒掃漁磯共置樽  
山下黃童爭看舞  
江干白骨已銜恩  
時詹方議

寄鄧道士

并引

羅浮山有野人相傳葛稚川之隸也  
鄧道士守安山中有道者也嘗於庵前見其足迹長二尺許紹聖二年正月十日予偶讀韋蘇州寄全椒山中道士詩云今朝郡齋冷忽念山中客澗底束荆薪歸來煮白石遙持一樽酒遠慰風雨夕落葉滿空山何處尋行迹乃以酒一壺仍依蘇州韻作詩寄之云  
一杯羅浮春遠餉採薇客遙知獨酌罷醉卧松下石幽人不可見清嘯聞月夕聊戲庵中人空飛本無迹

上元夜

前年侍玉輦端門萬枝燈壁月挂杲恩珠星綴觚稜去年中山府老病亦霄興牙旗穿夜市鐵馬響春冰今年江海上海房寄山僧亦復舉膏火松間見層層散策梳榔林林疎月鬢髻使君置酒罷簫鼓轉松陵狂生來索酒賈道一人也舉輒數升浩歌出門去我亦歸曹騰

正月二十四日與兒子過賴仙芝玉原秀才僧曇穎行全道士何宗一同遊羅浮道院及栖禪精舍過作詩和其韻寄邁迨

斷橋隔勝踐脫屣欣小憩瘴花已繁紅官柳猶疎細斜川二三子悼歎吾年逝淒涼羅浮館風壁頽雨砌黃冠常苦飢迎客羞破袂仙山在何許歸鶴時墮毳崎嶇拾松黃欲



東坡詩集 卷之十一  
救齒髮弊坐令禪客笑一夢等千歲栖禪晚置酒蠻果粲  
萸荔齋厨金無羨野餉籃有蕙嬉遊趁時節俯仰了此世  
猶當洗業障更作臨水禊寄書陽羨兒并語長頭弟門戶  
各努力先期畢租稅

正月二十六日偶與數客野步嘉祐僧舍東南野人  
家雜花盛開扣門求觀主人林氏媪出應白髮青  
裙少寡獨居三十年矣感歎之餘作詩記之

纒帶細枝出絳房綠陰青子送春忙涓涓泣露紫含笑焰  
焰燒空紅佛桑落日孤煙知客恨短籬破屋爲誰香主人  
白髮青裙袂子美詩中黃四娘

追餞正輔表兄至博羅賦詩爲別

孤城南遊墮黃管君亦何事來收蠻艤舟蟹戶龍岡窟置  
酒柳葉桃榔間高談已笑衰語陋傑句尤覺清詩孱博羅  
小縣僧舍古我不忍去君忘還君應回望秦與楚夢涉漢  
水愁秦關我亦坐念高安客神遊黃檗叅洞山何時曠蕩  
洗瑕謫與君歸駕相追攀梨花寒食隔江路兩山遙對雙  
烟鬟歸耕不用一錢物惟要兩脚飛屣顏玉牀丹鏃記分  
我助我金鼎光爛斑

真一酒 并引

米麥水三一而已此東坡先生真一酒也

撥雪披雲得乳泓蜜蠶又欲醉先生

真一色味頗類予在黃州日所醞密酒也

稻垂麥仰陰陽足器潔泉新表裏清曉日着顏紅有暈春  
風入髓散無聲人間真一東坡老與作青州從事名

游博羅香積寺 并引

寺去縣七里三山大牙夾道皆美田麥禾甚茂寺下谿水可作碓磨若築塘百步閘而落之可轉兩輪舉四杵也以屬縣令林抃使督成之

二年流落鼉魚鄉朝來喜見麥吐芒東風搖波舞淨綠初日滋露酣嬌黃汪汪春泥已沒膝剡剡秋穀初分秧誰言萬里出無友見此二美喜欲狂三山屏擁僧舍小一谿雷轉松陰涼要令水力供磴磨與相地脉增隄防霏霏落雪看收麪隱隱疊鼓聞春糠散流一啜雲子白炊裂十字瓊肌香豈惟宰凡薦古味束皙餅賦云漫頭薄持起搜牢凡要使真一流仙漿詩成捧腹便絕倒書生說食真膏旨

連雨江漲

越片岡頭雲出山峯柯江上水如天淋淋避漏幽人屋浦

浦移家艇子船龍卷魚鰕并雨落入隨雞犬上墻眠祗應樓下平堵水長記先生過嶺年

四月十一日初食荔支

南村諸楊北村盧謂楊梅盧橘也白花青葉冬不枯垂黃綴紫煙雨裏特與荔支爲先驅海山仙人絳羅襦紅紗中單白玉膚不須更待妃子笑風骨自是傾城姝不知天工有意無遣此尤物生海隅雲山得伴松檜老霜雪自困楂梨麓先生洗瓊酌桂醕冰盤薦此頰虬珠似開江鱧斫玉柱更洗河豚烹腹腴予嘗謂荔支厚味高格兩絕果中無比惟江鱧柱河豚魚近之耳我生涉世本爲口一官久已輕尊鱸人間何者非夢幻南來萬里真良圖

枕榔杖寄張文潛一首時初聞黃魯直遷黔南范淳

父九疑也

睡起風清酒在亡身隨殘夢兩茫茫江邊曳杖桄榔瘦林  
下尋苗蕞撥香獨步儻逢响屨令遠來莫恨曲江張遙知  
魯國真男子獨憶平生盛孝章

同正輔表兄游白水山

偉哉造物真豪縱攫土搏沙為此弄擘開翠峽走雲雷截  
破奔流作潭洞因隨化人履巨迹得與仙兄攝飛鞚曳杖  
不知巖谷深穿雲但覺衣裘重坐看驚鳥投霜葉知有老  
蛟蟠石甕金沙玉礫粲可數古鏡寶奩寒不動念兄獨立  
與世疎絕境難到惟我共永辭角上兩蠻觸一洗胷中九  
雲夢浮來山高回望失武陵路絕無人送筠籃擷翠爪甲  
香素纒分碧銀餅凍歸路霏霏湯谷暗野堂活活神泉涌

解衣浴此無垢人身輕可試雲間屨

次韻正輔同游白水山

抵知楚越為天涯不知肝膽非一家此身如綫自縈繞左  
回右轉隨練車誤拋山林入朝市平地咫尺千褒邪欲從  
稚川隱羅浮先與靈運開永嘉首參虞舜欵韶石次謁六  
祖登南華仙山一見五色羽雪樹兩摘南枝花赤魚白蟹  
筋屨下黃柑綠橘籩常加糖霜不待蜀客寄荔支莫信閩  
人誇恣傾白蜜收五稜細斲黃土栽三楹正輔分人參一  
苗歸種韶陽來  
詩本用礪字惠州無書不見  
此字所出故且從木奉和朱明洞裏得靈草翩然放杖  
凌蒼霞豈無軒車駕熟鹿亦有鼓吹號寒蛙仙人勸酒不  
用勺石上自有樽壘窪徑從此路朝玉闕千里莫遣毫釐  
差故人日夜望我歸相迎欲到長風沙豈知乘槎天女側

獨倚雲機看織紗世間誰似老兄弟篤愛不復相疵瑕相  
攜行到水窮處庶幾一見留子嗟千年枸杞常夜吠無數  
草棘工藏遮但令凡心一洗濯神人仙藥不我遐山中歸  
來萬想滅豈復回顧雙雲鴉

十一月九日夜夢與人論神仙道術因作一詩八句

既覺頗記其語錄呈子由弟後四句不甚明了今

足成之耳

析塵妙質本來空夢中於此句若更積微陽一綫功照夜  
一燈長耿耿閉門千息自濛濛養成丹竈無煙火點盡人  
間有暈銅寄語山神停伎倆不聞不見我何窮

雨後行菜

夢回聞雨聲喜我菜甲長平明江路濕並岸飛雨漿天公

真富有膏乳瀉黃壤霜根一番滋風葉漸俯仰未任筐筥  
載已作杯案想艱難生理窄一味敢專饗小摘飯山僧清  
安寄真賞芥藍如菌蕈脆美牙頰響白菘類羔豚冒土出  
踏掌誰能視火候小竈當自養

新年

曉雨暗人日春愁連上元水生挑菜渚煙濕落梅村小市  
人歸盡孤舟鶴踯躅猶堪慰寂寞漁火亂黃昏  
海國空自暖春山無限清冰谿結瘴雨雪菌到江城更待  
輕雷發先催凍笋生豐湖有藤菜似可敵蓴羹

二月八日與黃燾僧曇穎過道遙堂何道士宗一問

疾

安心守玄牝閉眼覓黃庭問疾來三士澆愁有半餅風松

時落藥病鶴不梳翎樽空我歸去山月照君醒

次韻高要令劉湜峽山寺見寄

新聞妙無多舊學閑可束猶當隱季生未遽逃梅福空腸  
吐餘息靜似蠶綴簇寸田結初果秀若銅生綠荆棘掃誠  
盡梨棗憂不熟高人寧鑄金下士乃服玉君看嶺嶠隘我  
欲巾笥蓄曾攀羅浮頂亦到朱明谷旋觀真歷塊歸卧甘  
破屋故人老猶仕世味薄如穀偶從越女笑不怕蠻江浴  
驚聞尺書到喜有新詩辱應憐五管客曾作八州督骨消  
讒口鑠膽破獄吏酷壟雲不易寄江月乃可掬遙知清遠  
寺不稱空洞腹蹇驢步武碎短瑟絃柱促仰看泉落珮俯  
聽石響轂千峰瀉清駛一往無回蹠狂雷失晤語過電不  
容目要知僧長飢正坐山少肉人間無南北蝸角空出縮

仇池九十九仇池有九十九泉嵩山三十六子由近買嵩

山甚近天人同一夢仙凡無兩錄陋邦真可老生理亦粗足

便回熱天焰長作照海燭燕天焰見退之詩近黃魯直寄  
中燒百川魯直蓋近有得也

遷居有引

吾紹聖元年十月二日至惠州寓合江樓是月十八日

遷于嘉祐寺二年三月十九日復遷于合江樓三年四

月二十日復歸于嘉祐寺時方卜築白鶴峰之上新居  
成庶幾其少安乎

前年家水東回首夕陽麗去年家水西濕面春雨細東西  
兩無擇緣盡我輒逝今年復東徙舊館聊一憇已買白鶴  
峰規作終老計長江在北戶雪浪舞吾砌青山滿墻頭髮  
鬢幾雲髻雖慙抱朴子金鼎陋蟬蛻猶賢柳州廟俎薦

丹荔吾生本無待俯仰了此世念念自成劫塵塵各有際  
下觀生物息相吹等蚊蚋

丙子重九

三年瘴海上越嶠真我家登山作重九巒菊秋未花唯有  
黃茆根堆壟生坊家涎酒藥衆毒酸甜如梨楂何以侑一  
樽隣翁餽毒蛇亦復強取醉歡謠雜悲嗟今年吁惡歲僵  
仆如亂麻此會我雖健狂風卷朝霞使我如霜月孤光挂  
天涯西湖不欲往墓樹號寒鴉

白鶴峰新居欲成夜過西鄰翟秀才

林行婆家初閉戶翟夫子舍尚留關連娟缺月黃昏後縹  
眇新居紫翠間繫悶豈無羅帶水韓退之云水作青割愁  
還有劔鏃山柳子厚云海上天峰若劔鏃秋中原北望無

歸日鄰火村春自往還

次韻子由所居二首

先生飯土墻無物與劉叉何以娛醉客時艱砌下花井水  
分西鄰竹陰借東家蕭然行脚僧一身寄天涯  
新居已覆瓦無復風雨憂橙栽與籠竹小詩亦可求尚欲  
煩貳師刻山出飛流應須鑿百尺兩繩載一牛

循守臨行出小彙復用前韻

學語雛鸞在柳陰臨行呼出翠帷深通家不隔同年面守  
同年得路方知異日心趁着春衫游上苑要求國手教新  
音嶺梅不用催歸騎截銜須防舊所臨循守近為留

種茶

松間旅生茶已與松俱瘦茨棘尚未容蒙翳爭交構天公

所遺棄百歲仍穉幼紫筍雖不長孤根乃獨壽移栽白鶴  
嶺土軟春雨後彌旬得連陰似許晚遂茂能忘流轉苦哉  
戢出鳥味未任供白磨且作資摘嗅千團輸大官百餅銜  
私鬪何如此一啜有味出吾囿

白鶴山新居鑿井四十尺遇盤石石盡乃得泉

海國困烝溽新居利高寒以彼陟降勞易此寢處乾但苦  
江路峻常慙汲腰酸矻矻煩四夫礪礪斷層巒彌旬得尋  
丈下有青石磐終日但迸火何時見飛瀾豐我粲與膠利  
汝權與鑽山石有時盡我意殊未闕今朝僮僕喜黃土復  
可搏晨餅得雪乳莫甕泔冰湍我生類如此何適不艱難  
一勺亦天賜曲肱有餘饜

三月二十九日

南嶺過雲開紫翠北江飛雨送淒涼酒醒夢回春盡日閉  
門隱几坐燒香

行瓊儋間肩輿坐睡夢中得句云千山動鱗甲萬谷  
酣笙鐘覺而遇清風急雨戲作此數句

四州環一島百洞蟠其中我行西北隅如度月半弓登高  
望中原但見積水空此生當安歸四顧真途窮眇觀大瀛  
海坐詠談天翁茫茫太倉中一米誰雌雄幽懷忽破散永  
嘯來天風千山動鱗甲萬谷酣笙鐘安知非羣仙鈞天宴  
未終喜我歸有期舉酒屬青童急雨豈無意催詩走羣龍  
夢雲忽變色笑雷亦改容應怪東坡老顏衰語徒工久矣  
此妙聲不聞蓬萊宮

遷居之夕聞鄰舍兒誦書欣然而作

幽居亂蛙黽生理半人禽  
蹙然已可喜况聞弦誦音兒聲  
自員美誰家兩青衿且欣習齊咻  
未敢笑越吟九齡起韶  
石姜子家日南吾道無南北安知不生今海濶尚挂斗天  
高欲橫參荆榛短墻缺燈火破屋深引書與相和置酒仍  
獨斟可以侑我醉琅然如玉琴

聞子由瘦

儻耳至難得肉食

五日一見花豬肉十日一遇黃雞粥  
土人頓頓食諸芋薦以熏鼠燒蝙蝠  
舊聞蜜唧嘗嘔吐稍近蝦蟇緣習俗十年  
京國厭肥瘠日日蒸花壓紅玉從來此腹負將軍今者固  
宜安脫粟俗諺云大將軍食飽捫腹而歎曰我不負汝左  
右曰將軍固不負此腹此腹負將軍未嘗出少  
也智慮人言天下無正味即且未遽賢麋鹿海康別駕復何  
為峭寬帶落驚僮僕相看會作兩隴仙還鄉定可騎黃鶴

宥老楮

我墻東北隅張王維老穀樹先樗櫟大葉等桑柘沃流膏  
馬乳漲墮子楊梅熟胡為尋丈地養此不材木蹶之得輿  
薪規以種松菊靖言求其用略數得五六膚為蔡侯紙子  
入桐君錄黃繒練成素黝面頰作玉灌酒蒸生菌腐餘光  
吐燭雖無傲霜節幸免狂醒毒孤根信微陋生理有倚伏  
投斧為賦詩德怨聊相贖

糴米

糴米買束薪百物資之市不緣耕樵得飽食殊少味再拜  
請邦君願受一塵地知非笑昨夢食力免內愧春秧幾時  
花夏稗忽已穉悵焉撫耒耜誰復識此意

過於海舶得邁寄書酒作詩遠和之皆粲然可觀子



由有書相慶也因用其韻賦一篇并寄諸子姪  
我似老牛鞭不動雨滑泥深四蹄重汝如黃犢走却來海  
濶山高百程送麼幾門戶有八慈不恨居鄰無二仲他年  
汝曹笏滿牀中夜起舞踏破甕會當洗眼看騰躍莫指癡  
腹笑空洞譽兒雖是兩翁癖積德已自三世種豈惟萬一  
許生還尚恐九十煩珍從六子晨耕簞瓢出眾婦夜績燈  
火共春秋古史乃家法詩筆離騷亦時用但令文字還照  
世冀土腐餘安足夢

上元夜過赴儋守召獨坐有感戊寅歲

使君置酒莫相違守舍何妨獨掩扉靜看月窓盤蜴蜥卧  
聞風慢落蛭蟻燈花結盡吾猶夢香篆消時汝欲歸搔首  
淒涼十年事傳柑歸遺滿朝衣

### 新居

朝陽入北林竹樹散疎影短籬尋丈間寄我無窮境舊居  
無一席逐客猶遭屏結茅得茲地翳翳村巷永數朝風雨  
涼畦菊發新穎俯仰可卒歲何必謀二頃

用過韻冬至與諸生飲酒

小酒生黎法乾糟几盎中芳辛知有毒滴瀝取無窮凍醴  
寒初泫春醅暖更饒華 兩樽合醉笑一歡同里閭峩山  
北田園震澤東歸期那敢說安訊不曾通鶴鬢驚全白犀  
圍尚半紅愁顏解符老壽耳鬪吳翁得穀鵝初飽亡貓鼠  
益豐黃薑收土芋蒼耳斫霜叢見瘦緣儲藥奴肥爲種松  
頻頻非竊食數數尚乘風河伯方夸若靈媧自舞馮歸途  
陷泥渾炬火燎茅蓬滕上王文度家傳張長公和詩仍醉

墨戲海亂羣鴻

符吳皆坐客其餘皆即事實錄也

縱筆

父老爭看烏角巾應緣曾現宰官身谿邊古路三叉口獨立斜陽數過人

北船不到米如珠醉飽蕭條半月無明日東家知祀竈隻雞斗酒定贖吾

被酒獨行編至子雲威徽先覺四黎之舍二首

半醒半醉問諸黎竹刺藤梢步步迷但尋牛矢覓歸路家在牛欄西復西

總角黎家三小童口吹葱葉送迎翁莫作天涯萬里意谿邊自有舞雩風

庚辰歲人日作時聞黃河已復北流老臣舊數論此

今斯言乃驗

老去仍栖隔海村夢中時見作詩孫天涯已慣逢人日歸路猶欣過鬼門三策已應息賈讓孤忠終未赦虞翻典衣剝買河源米屈指新筍作上元

不用長愁挂月村檳榔生子竹生孫海南勒竹每節生枝如竹竿大蓋竹孫也

新巢語燕還窺硯舊雨來人不到門春水蘆根看鶴立夕陽楓葉見鴉翻此生念念隨泡影莫認家山作本元

庚辰歲正月十二日天門冬酒熟予自漉之且漉且

嘗遂以大醉

自撥牀頭一甕云幽人先已醉濃芬天門冬熟新年喜

米春香並舍聞杜子美詩云聞道雲安麴米春蓋酒名也菜圃漸疎花漠漠竹

扉斜掩雨紛紛擁裘睡覺知何處吹面東風散纈紋

追和戊寅歲上元

春鴻社燕巧相違  
白鶴峰頭白板扉  
石建方欣洗滌廁  
姜龐不解歎蟪蛄  
一龕京口嗟春夢  
萬炬錢塘憶夜歸  
合浦賈珠無復有  
當年笑我泣牛衣

汲江煎茶

活水還須活火烹  
唐人云茶須緩火多活火煎  
自臨鈞石取深清  
大瓢貯月歸春甕  
小杓分江入夜甌  
茶雨已翻煎處脚  
松風忽作瀉時聲  
枯腸未易禁三盃  
坐數荒村長短更

澄邁驛通潮閣

餘生欲老海南村  
帝遣巫陽招我魂  
杳杳天低鵲沒處  
青山一髮是中原

六月二十日夜渡海

參橫斗轉欲三更  
苦雨終風也解晴  
雲散月明誰點綴  
天容海色本澄清  
空餘魯叟乘桴意  
粗識軒轅奏樂聲  
九死南荒吾不恨  
茲遊奇絕冠平生

初余

歐陽晦夫遺接離琴枕戲作此詩謝之

攜兒過嶺今七年  
晚途更著衣冠白  
頭穿林要藤帽赤  
脚渡水須花縵  
不愁故人驚絕倒  
但使俚俗相恬安  
見君合浦如夢寐  
挽鬚握手俱沈瀾  
妻縫接離霧縠細  
兒送琴枕冰徹寒  
無絃且寄陶令意  
倒載猶作山公看  
我懷汝陰六一老  
眉宇秀發如春巒  
羽衣鶴氅古仙伯  
岌岌兩柱扶霜紈  
至今畫像作此服  
凜如退之加渥丹  
爾來前輩皆鬼錄  
我亦帶脫巾  
欹寬作詩頗似六一語  
往往亦帶梅翁酸  
送鮮于都曹歸蜀灌口舊居

爾盡霜鬚照碧銅依然春雪在長松朝行犀浦催收芋夜  
度繩橋看伏龍莫歎倦游無駟馬要將老健敵千鍾子  
三世惟身在爲向西南說病容

將至廣州用過韻寄邁迨二子

皇天遣出家臨老乃學道北歸爲兒子破戒堪一笑披雲  
見天眼回首失海濤蠻唱與黎歌餘音猶杳杳大兒牧衆  
穉四歲守孤嶠次丁病學醫三折乃粗曉小兒耕且養得  
暇爲書繞我亦困詩酒去道愈茫渺紛紛何時定所至皆  
可老莫學柳儀曹詩書教眠猿亦莫事登陟谿山有何好  
安居與我游閉戶淨洒掃

次韻韶倅季通直

一篇瀧吏可書紳莫向長沮更問津老去常憂伴新鬼歸

來且喜是陳人曾陪令尹蒼髯古又見郎君白髮新回首  
天涯一惆悵却登梅嶺望楓宸

過嶺

暫著南冠不到頭却隨北雁與歸休平生不作兔三窟今  
古何殊貉一丘當日無人送臨賀至今有廟祀潮州劔關  
西望七千里乘興真爲玉局游

留題顯聖寺

渺渺疎林集晚鴉孤村煙火梵王家幽人自種千頭橘遠  
客來尋百結花浮石已乾霜後水隄坑閑試雨前茶紙疑  
歸夢西南去翠竹江村繚白沙

贈詩僧道通

雄豪而妙苦而腴祇有琴聰與蜜殊

錢塘僧息隱著角詩  
琴後捨琴而學詩

棄詩而學道其詩似皎然而加雄放安州僧仲殊語帶煙  
霞從古少李太白云他人之如氣含蔬笋到公無謂無  
香村乍喜聞蒼菊古井惟愁斷輓轆為報韓公莫輕許  
從今鳥可是詩奴

雷州三首

粵嶺風俗殊有疾時勿藥束帶趨房祀用史巫紛若絃歌  
薦繭栗奴至洽觴酌呻吟殊未央更把雞骨灼  
粵女市無常所至輒成區一日三四遷處處售鰕魚青裙  
脚不韞臭味猿與狙孰云風土惡白洲生綠珠  
海康臘已酉不論冬孟仲殺牛槌鼓祭城郭為傾動雖非  
堯頌曆自我先人用苦笑荆楚人嘉平臘雲夢

次韻董夷仲茶磨

前人初用茗飲時煮之無問葉與骨寢窮厥味白始用復  
計其初碾方出計盡功極至於磨信哉智者能創物破槽  
折杵向墻角亦其遭遇有伸屈歲久講求知處所佳者出  
自衡山窟巴蜀石工強鑄鑿理疎性軟良可咄予家江陵  
遠莫致塵土何人為披拂

揚州以土物寄少游

鮮鯽經年秘醯醪團臍紫蟹脂填腹後春尊苗活如酥先  
社薑芽肥勝肉烏子纍纍何足道點綴盤餐亦時欲淮南  
風俗事餅鬻方法相傳竟留蓄且同千里寄鷄毛何用致  
致飲麋鹿

再過泗上

眼明初見淮南樹十客相逢九吳語旅程已付夜帆風客

睡不妨背船雨黃柑紫蟹見江海紅稻白魚飽兒女慇懃  
買酒謝船師千里勞君勤轉櫓

夜泊牛口

日落江霧生繫舟宿牛口居民偶相聚三四依古柳負薪  
出深谷見客喜且售煮蔬爲夜餐安識肉與酒朔風吹茆  
屋破壁見星斗兒女自咿憂亦足樂且久人生本無事苦  
爲世味誘富貴耀吾前貧賤獨難守誰知深山子甘與麋  
鹿友置身落巒荒生意不自陋今子獨何者汲汲強奔走  
黃牛廟

江邊石壁高無路上有黃牛不服箱廟前行客拜且舞擊  
鼓吹簫屠白羊山下耕牛苦磽确兩角磨崖四蹄濕青芻  
半束長苦飢仰看黃牛安可及

渚宮

渚宮寂寞依古郢楚地荒茫非故基二王臺閣已鹵莽  
王高 何況遠聞縱橫時楚王獵罷擊靈鼓猛士操舟張水  
嬉釣魚不復數魚鼈大鼎千石蛟螭當時郢人架宮殿  
意思絕妙般與倕飛樓百尺照水上有燕趙千娥眉臨  
風揚揚意自得長使宋玉作楚詞秦兵西來取鐘簾故宮  
禾黍秋離離千年壯觀不可復今之存者蓋已甲池空野  
迥樓閣小惟有深竹藏狐狸臺中絳帳誰復見臺下野水  
一作 浮清漪綠窓朱戶春晝閉想見深屋彈朱絲腐儒亦  
解愛聲色何用白首談孔姬沙泉半涸草堂在破窓無紙  
風聽聽陳公蹤跡最未遠七瑞寥落今何之百年人事知  
幾變直恐荒廢成空陂誰能爲我訪遺迹草中應有湘東

碑

出峽

入峽喜巉崑出峽愛平曠吾心淡無累遇境即安暢東西  
 徑千里勝處頗屢訪幽尋遠無厭高絕每先上前詩尚遺  
 畧不錄久恐忘憶從巫廟回中路寒泉漲汲歸真可愛翠  
 碧光滿益忽驚巫峽尾岩腹有穿壙仰見天蒼蒼石室開  
 南嚮宣尼古廟宇叢木作幃帳鐵楯橫半空俯瞰不計丈  
 古人誰架備下有不測浪石甕見天困瓦棺悲古葬新灘  
 阻風雪村落去樵杖亦列龍馬溪茆屋沾村釀玉虛悔不  
 至實為舟人誑聞道石最奇寤寐見怪狀峽山富奇偉得  
 一知幾喪苦恨不知名歷歷但想像今朝脫重險楚水渺  
 平蕩魚多客庖足風順行意王追思偶成篇聊助舟人唱

巫山

瞿塘迤邐盡巫峽崢嶸起連峰稍可怪石色變翠天工  
 運神巧漸欲作奇偉坱圠勢方深結構意未遂旁觀不暇  
 瞬步步造幽邃蒼崖忽相逼絕壁凜可悸仰觀入九頂俊  
 爽凌顛氣晃蕩天宇高奔騰江水沸孤超死不讓直拔勇  
 無畏攀緣見神宇憇坐就石位噉噉隔江波一一問廟吏  
 遙觀神女石綽約誠有以俯首見斜鬟拖霞弄脩被人心  
 隨物變遠覺含深意野老笑吾旁少年嘗屢至去隨猿猱  
 上反以繩索試石筍倚孤峰突兀殊不類世人喜神怪論  
 說驚幼稚楚賦亦虛傳神仙安有是次問掃壇竹云此今  
 尚爾翠葉紛下垂婆娑綠鳳尾風來自偃仰若為神物使  
 絕頂有三碑詰曲古篆字老人那解讀偶見不能記窮探

到峰背採斫黃楊子黃楊生石上堅瘦紋如綺貪心去不  
顧澗谷千尋縋山高虎狼絕深入坦無忌淇濛草樹密葱  
蘢雲霞膩石竇有洪泉甘滑如流髓終朝自盥漱冷冽清  
心胃浣衣挂樹稍磨斧就石鼻徘徊雲日晚歸意念城市  
不到今十年衰老筋力憊當時伐殘木牙葉已如臂忽聞  
老人說終日爲嘆喟神仙固有之難在忘勢利貧賤爾何  
愛棄去如脫屣嗟爾苦無還絕糧應不死

鱖魚行

漸臺人散長弓射初噉鱖魚人未識西陵衰老總帳空肯  
向北河親饋食爾雄一律盜漢家嗜好亦若肩相差食每  
對之先太息不因噎嘔緣瘡痂中間霸據關梁隔一枚何  
啻千金直百年南北鮭菜通往在殘餘飽臧獲東隨海舶  
號倭螺異方珍寶來更多磨沙淪瀋成大截剖蚌作脯分  
餘波君不聞蓬萊閣下馳碁島八月邊風備胡獠船舶跋  
浪鼉鼉震長鏡鏿處崖谷倒膳夫善治薦華堂坐令雕俎  
生輝光肉芝石耳不足數醋茗魚皮真倚墻中都貴人珍  
此味糟滫油藏能遠致割肥方厭萬錢厨決昔可醒千日  
醉三韓使者金鼎來方奩饋送煩輿臺遼東太守遠自獻  
臨菑掾吏誰爲材吾生東歸收一斛包苴未肯鑽華屋分  
送羹材作眼明却取細書防老讀

寄周安孺茶

大哉天宇內植物知幾族靈品獨標奇迥超凡草木名從  
姬且始漸播桐君錄賦詠誰最先厥傳惟杜育唐人未知  
好論著始於陸常李亦清流當年慕高躅遂使天下士嗜



此偶於俗豈但中土珍兼之異邦 鬻鹿門有佳士博覽無  
不矚邂逅天隨翁篇章互賡續開園頤山下屏迹松江曲  
有興卽揮毫燦然存簡牘伊予素寡愛嗜好本不篤越自  
少年時低回客京轂雖非曳裾者庇蔭或華屋頗見綺紈  
中齒牙厭梁肉小龍得屢試糞土視珠玉團鳳與葵花砥  
硃雜魚目貴人自矜惜捧玩且緘櫝未數日注卑定知雙  
井辱於茲自研討至味識五六自爾入江湖尋僧訪幽獨  
高人固多暇探究亦頗熟聞道早春時攜籬赴初旭驚雷  
未破蕾采采不盈掬旋洗玉泉蒸芳馨豈停宿須臾布輕  
縷火候謹盈縮不憚頃間勞經時廢藏蓄髣髴淨無染箬  
籠勻且複苦良梅潤侵暖須人氣煥有如剛耿性不受纖  
芥觸又若廉夫心難將微穢瀆晴天敞虛府石碾破輕綠  
永日遇閑賓乳泉發新馥香濃露色嫩欺秋菊閩俗  
競傳誇豐腴面如粥自云葉家白頭勝中山醪好是一杯  
深午窓春睡足清風擊兩腋去欲逐鴻鵠嗟我樂何深水  
經亦屢讀陸子咤中冷次乃康王公蟬培頃嘗甌罌走  
僮僕如今老且懶細事百不欲美惡兩俱忘誰能強追逐  
薑鹽拌白土稍稍從吾蜀尚欲外禮安能狗心腹由來  
薄滋味日飯止脫粟外慕旣已矣三爲此羈束昨日散幽  
步偶上天峰麓山圃正春風蒙茸青旌簇呼兒爲佳客採  
掣聊亦復地僻誰我從包藏罾厨之何嘗較優劣但喜破  
睡速况此夏日長人間正炎毒幽六無一事午飯飽蔬菽  
困卧北窓風風微動窓竹乳甕十<sub>六</sub>滿人世真局促意爽  
飄欲仙頭輕快如沐昔人固多癖<sub>七</sub>癖良可贖爲問劉伯

倫胡然枕糟麪

荊州六首

遊人出三峽楚地盡平川北客隨南賈吳檣間蜀船江侵  
平野斷風捲白沙旋欲問興亡意重城自古堅  
南方舊戰國慘澹意猶存慷慨因劉表淒涼爲屈原廢城  
猶帶井古姓聚成村亦解觀形勝昇平不敢論  
朱檻城東角高王此望沙江山非一國烽火喪三巴戰骨  
淪秋草危樓倚斷霞百年豪傑盡復憶元魚蝦  
沙頭煙漠漠來往厭喧卑甲冑分麀關官旣過渡遲遊人  
多問卜僮叟盡攜龜日暮江天靜無人唱楚詞  
殘牖多風雪荆人重歲時客心何草草里巷白嬉嬉爆竹  
驚鄰鬼驅讎逐小兒故人忘念我石壁空無人涯

江水深成窟潛魚大似犀亦鱗如琥珀老枕勝玻璃上客  
舉雕俎佳人搖翠篋登庖更作噐何以免屠割

去歲與子野遊逍遙堂日欲沒因並西山叩羅浮道  
院至已二鼓矣遂宿于西堂今歲索居儋耳子野  
復來相見作詩贈之

往歲追歡地寒窓夢不成笑談驚半夜風雨暗長檠雞唱  
山椒曉鐘鳴霜外聲只今那復見髮鬢似三生

答子勉

君不登郎省還應上諫坡才高殊未識歲晚幸無他櫪馬  
羸難出鄰雞凍不歌寒爐餘幾火灰裏撥陰何

壺中九華詩

湖口人李正臣蓄異石九峰玲瓏宛轉若窓櫺然余欲

以百金買之與仇池石為偶方南遷未暇也名之曰壺  
中九華且以詩識之

我家岷蜀最高峰

一作清溪電  
轉失雲峰

夢裏猶驚翠掃空五嶺莫

愁千嶂外九華今在一壺中

一作石泉  
影落涓涓

天池水落層層見

滴玉女窓明處處通念我

仇池太孤絕百金歸買小

玲瓏

過嶺寄子由

七年來往我何堪又試曹溪一勺甘夢裏似曾遷海外醉  
中不覺到江南波生濯足鳴空澗霧遶征衣滴翠嵐誰遣  
山雞忽驚起半岩花雨落毵毵

歇白塔舖

甘山廬阜鬱長望林隙依

一作  
熹微漏日光吳國晚蟪初斷

葉占城早稻欲移秧迢迢澗水隨人急冉冉岩花撲馬香  
望眼儘從窮一作飛鳥遠白雲深處是吾鄉

西蜀楊耆二十年前見之甚貧今見之亦貧所異於  
昔者蒼顏華髮耳女無美惡富者妍士無賢不肖  
貧者鄙使其逢時遇合豈減當世之士哉頃宿長  
安驛舍聞泣者甚怨問之乃昔富而今貧者乃作  
一詩今以贈楊君

孤村漸微

一作

雨逐秋涼逆

旅愁入怨夜長不寐相看唯櫪

馬愁吟

一作

互答有寒螿

天寒滯穗猶橫畝歲晚空機尚

倚墻勸爾一杯聊復睡人

聞貧富游茫茫

趙成伯家有姝麗僕忝鄉人不肯開樽徒吟春雪謹

依元韻以當一笑

繡簾朱戶未曾開誰見梅花落鏡臺試問高吟三十韻俗檢驗死秀才帶何如低唱兩三杯世傳陶穀學士買得党  
上有詩三十韻何如低唱兩三杯太尉家故妓遇雪陶取  
雪水烹團茶謂妓曰党家應不識此妓曰彼籠人安有此  
景但能於銷金暖帳下應不識此妓曰彼籠人安有此  
媿其莫嫌衰髻聊相映須得纖腰與其回知道文君隔青  
鎖梁園賦客敢言才聊蒼來句義取婦人而已罪過罪過

獄中寄子由二首

聖主如天萬物春小臣愚暗自忘身百年未滿先償債十  
口無歸更累人是處青山可埋骨他年夜雨獨傷神與君  
世世為兄弟更結人間未了因

栢臺霜氣夜淒淒風動琅璫月向低夢遶雲山心似鹿魂  
飛湯火命如雞眼中屏角真吾子身後牛衣愧老妻百歲  
神遊定何處桐鄉知葬浙江西獄中聞湖杭民為余作解厄齋經月所以有此句也

朱邑葬桐鄉還角杜琮事

出獄次前韻二首

百日歸期恰及春殘生樂事最關身出門便旋風吹面走  
馬聯翩鵲啁人却對酒杯渾是夢試拈詩筆已如神此灾  
何必深追咎竊祿從來豈有因

平生文字為吾累此去聲名不厭低塞上縱歸他日馬城  
中不鬪少年雞休官彭澤貧無酒隱几維摩病有妻堪笑  
睢陽老從事為余投檄向江西子由聞余下獄乞以官爵贖罪貶筠州監酒

之約云

次韻完夫再贈之什某已卜居毗陵與完夫有廬里  
柳絮飛時筴籜斑風流二老對開關雪芽我為求陽羨乳  
水君應餉惠山竹簟水風眠畫永玉堂制草落人間應容

緩急煩閩里桑柘聊同十畝閑

惠州近城數小山類蜀道春與進士許毅野步會意

處飲之且醉作詩以記適參寥專使欲歸使持此

以示西湖之上諸友庶使知余未嘗一日忘湖山

也

夕陽飛絮亂平蕪萬里春前一酒壺鐵化雙魚沉遠素劍

分二嶺隔中區花曾識面香仍好鳥不知名聲自呼夢想

平生消未盡滿林煙月到西湖

往年宿瓜步夢中得小詩錄示民師

吳塞蒹葭空碧海隋宮楊柳只金堤春風自恨無情水吹

得東流竟日西

僕年三十九在潤州道上過除夜作此詩又二十年

在惠州錄之以付過

寺官官小未朝叅紅日半窓春睡酣為報鄰雞莫驚覺更

容殘夢到江南

釣艇歸時菖葉雨綠車鳴處棘花風長江昔日經遊地盡

在如今夢寐中

送柳宜歸

折脚鐺邊煨淡粥曲枝桑下飲離杯書生不是南遷客應

魅驚人須早回

寒具乃拾頭出劉禹錫佳節

纖手搓來玉數尋碧油輕蘸嫩黃深夜來春睡濃於酒壓

褊佳人纏臂金

劉監倉家煎米粉作餅子余云為甚酥潘邠老家造

東坡詩集 卷一  
逶迤酒余飲之莫作醋錯着水來否後數日余攜  
家飲郊外因作小詩戲劉公求之二首

一杯連坐兩髯鬚  
數片深紅入座飛  
十分微醺君休訴  
且看桃花好面皮

唐詩云未有桃花面皮先作杏子眼孔

野飲花間百物無  
杖頭惟挂一葫蘆  
已傾潘子錯著水  
更覓君家爲甚酥

絕句

柴桑春晚息依依  
屋角鳴鳩雨欲飛  
昨日已收寒食火  
吹花風起却添衣

書辨才白雲堂壁

不辭清曉叩松扉  
却值支公久不歸  
山鳥不鳴天欲雪  
卷簾惟見白雲飛

和時運四首

丁丑二月十四日白鶴峰新居成  
嘉祐寺遷入詠淵  
明時運詩云斯晨斯夕言息其廬  
以爲余發也乃次其韻  
長子邁與余別三年矣挈攜諸  
萬里遠至老朽憂  
患之餘不能無欣然

我卜我居居非一朝  
龜不我欺食此江  
郊廢井已塞喬木  
千霄昔人伊何誰  
其裔苗

下有碧潭可飲可濯  
江山千里供我遐  
矚木固無脛瓦豈  
有足陶匠自至嘯  
歌相樂

我視此邦如沫如沂  
邦人勸我老矣安  
歸自我幽獨倚門  
或揮豈無親友雲  
散莫追

旦朝丁丁誰欵我  
廬子孫遠至笑語  
紛如翦髮垂髻一作

垂覆此瓠盃三年一夢乃復見余

和勸農六首

海南多荒田俗以買香為業所產稅稌不足於食乃以  
諸芋雜米作粥糜以取飽余既哀之乃和淵明勸農詩  
以告其有知者

浴爾漢黎均是一民鄙夷不訓夫豈其真怨忿劫質尋戈  
相因欺謾莫訢曲自我人

天禍爾土不麥不稷民無用物怪珍是殖播厥薰木腐餘  
是穡貪夫汚吏鷹鷂狼食

豈無良田廬廬平陸獸蹤交締鳥喙諧謔驚磨朝射猛狝  
夜逐芋羨諸糜以飽耆宿

聽我苦言其福永久利爾鋤耜好爾鄰偶斬艾蓬蘽南東  
其畝父兄措挺以扶遊手

天不假易亦不汝置春無遺勤秋有厚冀雲舉雨沃婦姑  
畢至我良孝愛袒跣何愧

逸諺戲侮博奕頑鄙投之生黎俾勿冠履霜降稻實千箱  
一軌大作爾社一醉醇美

和歸田園居三首

環州多白水際海皆蒼山以彼無盡景寓我有限年東家  
著孔丘西家著顏淵市為不二價農為不爭田周公與管  
蔡恨不節三閭我飽一飯足薇蕨補食前門生餽薪米救  
我厨無煙斗酒與隻雞酣歌饒華顛禽魚豈知道我適物  
自閑悠悠何必爾聊樂我所然

窮猿既投猿疲馬初解鞅心空飽新得境熟夢餘想江鷗

漸馴集蠶叟已還往南池綠錢生北嶺紫筍長提壺豈解  
飲好語時見廣春江有佳句我醉墮渺莽  
老人八十餘不識城市娛造物偶遺漏同儕盡丘墟平生  
不渡江水北有幽居手插荔枝子合抱三百株莫言陳家  
紫甘冷恐不如君來坐樹下飽食攜其餘歸舍遺兒子瘦  
抱不可虛有酒持飲我不問錢有無

與殷晉安別

和送昌化軍使張中罷官赴關

孤生知永棄末路嗟長勤久安儋耳陋日與雕題親海國  
此奇士官居我東鄰卯酒無虛日夜暮有達晨小甕多自  
釀一瓢時見分仍將對牀夢伴我五更春暫聚水上萍忽  
散風中雲恐無再見日笑談來生因空吟清詩送不救歸  
裝貧

和王撫軍座送客

再送張詩

曾中有佳處海瘴不能屏三年無所愧十口今同歸汝去  
莫相憐我生本無依相從大塊中幾合幾分違莫作往來  
相而生愛見悲悠悠含山日爛爛留清暉懸知冬夜長不  
恨晨光進夢中無與別作詩記忘遺

形贈影

天地有常運日月無閑時孰居無事中作止推行之細察  
我與汝相因以成茲忽然棄物化豈與生滅期夢時我方  
寂偃然無所息胡爲有哀樂輒復隨漣而我舞汝凌亂相  
應不少疑還將醉時語答我夢中辭

影答形

丹青寫君容常恐畫師拙我依月燈出相肖兩奇絕妍媸



東坡詩集 一百三  
本在君我豈相媚悅君如火上煙火盡君乃別我如鏡中  
像鏡壞我不滅雖云附陰晴了不受寒熱無心但因物萬  
變君有竭醉醒皆夢爾未用議優劣

神釋

二子本無我其初因物著豈惟老變衰念念不如故知君  
非金石安足長託附莫從老君言亦莫用佛語仙山與佛  
國終恐無是處甚欲隨陶翁移家酒中住醉醒要有盡未  
易逃諸數平生逐兒戲處處餘件具所至人聚觀指日生  
毀譽如今一弄火好惡都焚去既無負載勞又無冠攘懼  
仲尼晚乃覺天下何息慮

怨詩楚調示龐主簿鄧治

當歡有餘樂在戚亦頽然淵明待此理安處故有年嗟我  
與先生所賦良奇偏人間少宜適惟有歸耘田我昔墮軒  
冕毫釐真市廛因來卧重裯憂愧自不眠如今破茅屋一  
夕或三遷風雨睡不知黃葉滿枕前寧當出怨句慘慘如  
孤煙但恨不早悟猶推淵明賢

和移居二首

余去歲三月自水東嘉祐寺遷居合江樓迨今一年多  
病寡歡頗懷水東之樂也得歸善縣後隙地數畝父老  
云古白鶴觀也意欣然欲居之乃和此詩

昔我初來時水東有幽宅晨與鳥鵲朝暮與牛羊夕誰令  
遷近市日有造請役歌呼雜閭巷鼓角鳴枕席出門無所  
詣樂事非宿昔病瘦彌彌年束薪誰與析

涸潭轉碕岸我作江郊詩今爲一屢氓此地乃得之葺爲

無邪齋息我無所息古觀廢已久白鶴歸何時我豈丁令威千歲復還茲江山朝福地古人不吾欺

歲暮作和張常侍

十二月二十五日酒盡取米欲釀米亦竭時吳遠遊陸道士客於余因讀淵明歲暮和張侍常亦以無酒爲歎乃用其韻贈二子

我生有天祿玄膺流玉泉何事與道士自養豈在繁但使荆棘一顏景薄西山歲暮似有得稍苦弱蔓纏養我歲寒枝曾有解鼠遷二子真我客不醉亦陶然

和郭主簿

今日復何日高槐布初陰良辰非虛名清和盈我襟孺子卷書坐誦詩如鼓琴却念四十年玉顏如汝今閉戶未嘗出出爲鄰里欽家世事酌古百史手自斟當年二老人喜我作此音淮德入我夢角羈未勝簪孺子笑問我君何念之深

和連雨獨飲

平生我與爾舉意輒相然豈止磁石鍼雖合猶有間此外一子由出處同偏僂晚景最可惜分飛海南天糾纏一作不吾欺寧此憂患先顧影一盃酒誰謂無往還寄語海北人今日爲何年醉裏有獨覺夢中無雜言

和贈羊長史

得鄭會嘉靖老書欲於海舶載書千餘卷見借因讀淵

明贈羊長史詩云愚生三季後慨然念黃虞得知千載  
事上賴古人書次其韻以謝鄭君

我非皇甫謐門人如摯虞不特兩鷓酒肯借一車書欲令  
海外士觀經似鴻都結髮事文史俯仰六十踰老馬不耐  
放長鳴息服輿故知根塵在未免病藥俱念君千里足歷  
塊猶踟躕好學真伯業比肩可相如此書久已熟救我今  
荒蕪顧慙桑榆迫豈厭詩酒娛秦賦病未能草玄老更疎  
猶當距楊墨稍欲懲荆舒

游斜川和正月五日與兒子過出游作

謫居澹無事何異老且休雖過堦節年未失斜川游春江  
淥未波人卧船自流我本無所適泛泛隨鳴鷗中流遇湫  
洄捨舟步曾丘有口可與飲何必逢我儔過子詩似翁我  
唱兒輒酬未知陶彭澤頗有此樂不問黠爾何如不與聖

同憂問翁何所笑不爲由與求

和癸卯歲始春懷古田舍

茆茨破不補嗟子乃爾貧菜肥人愈瘦竈閑井常勤我欲  
致薄少解衣勸坐人臨池作虛堂雨急瓦聲新客來有美  
載果熟多幽欣丹荔破玉膚黃柑溢芳津借我三畝地結  
茆爲子鄰鳩舌儻可學化爲黎母民

和飲酒五首

道喪士失已出語輒不情江左風流人醉中亦求名淵明  
獨清真談笑得此生身如受風竹掩冉衆葉驚俯仰各有  
態得酒詩自成

蠹蠕食葉蟲仰空慕高飛一朝備兩翅乃得粘網悲啁啾

厭巢雀沮澤疑可依赴水生兩殼遭閉何時歸二蟲竟誰  
是一笑百念衰幸此未化間有酒君莫違

籃輿兀醉守路轉古城隅酒力如過雨清風消半途前山  
正可數後騎且勿驅我緣在東南往寄白髮餘遙知萬松  
嶺下有三畝居

我夢入小學自謂總角時不記有白髮猶誦論語辭人間  
本兒戲顛倒略似茲惟有醉時真空洞了無疑墜車終無  
傷莊叟不吾欺呼兒具紙筆醉語輒錄之

曉曉六男子絃誦各一經復生五丈夫戢戢丁欲成歸田  
了門戶與國充踐更普兒初學語玉骨開天庭淮老如鶴  
雛破殼已能鳴舉酒屬千里一歡愧凡情

和止酒

丁丑歲余謫海南子由亦貶雷州五月十一日相遇於  
藤同行至雷六月十一日相別渡海余時病痔呻吟子  
由亦終夕不寐因誦淵明詩勸余止酒乃和元韻因以  
贈別庶幾真止矣

時來與物逝路窮非我止與子各意行同落百蠻裏蕭然  
兩別駕各攜一稚子子室有孟光我室惟法喜相逢山谷  
間一月同卧起茫茫海南北粗亦足生理勸我師淵明力  
薄且爲已微疴坐杯勺止酒則瘳矣望道雖未濟隱約見  
津溪從今東坡室不立社康祀

還舊居和夢歸惠州白鶴山居作

痿人常念起夫我豈忘歸不敢夢故山恐與墳墓悲生世  
本暫寓此身念念非鶴坡亦何有偶拾鶴毳遺窮魚守故

沼聚沫猶相依大兒當門戶時節供丁推夢與鄰翁言憫  
默憐我衰往來付造物未用相招麾

和庚戌歲九月中於西田穫早稻

蓬頭二獠奴誰謂愿且端晨興洒掃罷飽食不自安願治  
此圃畦少資主游觀晝功不自覺夜氣乃潛還早韭欲爭  
春晚松先破寒人間無正味美好出艱難早知農圃樂豈  
有非意干尚恨不持鉏未免駢我顏此心苟未降何適不  
問關休去復歎去菜食何所歎

和丙辰歲八月中於下田舍穫

聚糞西垣下鑿泉東垣隈勞奪何時休宴安不可懷天公  
豈相喜雨霽與意諧黃松養土羔老楮生樹雞未忍便烹  
煮繞觀日百迴跨海得遠信水盤鳴玉哀齒陳黠膾縷照

坐如花開一與蠶叟醉蒼顏兩摧頰齒根日浮動自與梁

肉垂食菜豈不足一作呼兒拆雞栖

和乙巳歲三月爲建威參軍使都經錢溪

喬木卷蒼藤浩浩崩雲積謝家堂前燕對語悲宿昔仰看  
桃榔樹玄鶴舞長翮新年結荔子主人黃壤隔谿陰宜館  
我稍省薪水役相如賣車騎五畝亦可易但恐鵬鳥來此  
生還蕩析誰能插籬權護此殘竹栢和游城北謝氏廢園

辛丑七月赴假還江陵夜行途中作口號和郊行步

缺月不早出長林踏青冥犬吠主人怒愧此閭里情怪我  
夜不歸蒞袂窺紫荆雲間與地上待我兩友生驚鳴再三  
起樹端已微明白露淨原野始覺丘陵平暗蛩方夜績孤  
螢亦霄征歸來閉戶坐寸田且默耕莫赴花月期免爲詩

東坡詩集  
酒祭詩人如布穀聒聒常自名

和雜詩二首

斜日照孤隙始知空有塵微風動衆竅誰信我忘身一笑  
問兒子與汝定何親從我來海南幽絕無四鄰耿耿如缺  
月獨與長庚晨此道固應爾不當怨尤人

故山不可到飛夢隔五嶺真游有黃庭閉目寓兩景室空  
無可照火滅膏自冷披衣起視夜海濶河漢永西窓半明  
月散亂梧楸影良辰不可繫逝水無留騁我苗期後枯持  
此一念靜

和擬古四首

有客叩我門繫馬門前柳庭空鳥雀散門閉客立久主人  
枕書卧夢我平生友忽聞剝啄聲驚散一杯酒倒裳起謝

客夢覺兩槐負坐談雜今古不答顏愈厚問我何處來我  
來無何有

客去室幽幽鵬鳥來坐隅引吭伸兩翮太息意不舒吾生  
如寄耳何者爲我廬去此復何之少安與汝居夜中聞長  
嘯月露荒榛蕪無問亦無答吉凶兩何如

少年好遠遊蕩志隘八荒九爲藩籬四海環我堂廬坐  
與若士何足期杳茫稍喜海南州自古無戰場奇峰望黎  
母何異嵩與却飛泉瀉萬仞舞鶴雙低昂分杯未入海膏  
澤彌此方芋魁儻可飽無肉亦奚傷

黎山有幽子形槁神獨完負薪入城市笑我儒衣冠生不  
聞詩書豈知有孔顏翛然獨往來榮辱未易關日暮鳥獸  
散家在孤雲端問答了不通歎息指屢彈似言君貴人草

莽栖龍鸞遺我吉貝布海風今歲寒

和桃花源詩

世傳桃源事多過其實攷淵明所記止言先世避秦亂來此則漁人所見似是其子孫非秦人不死者也又云殺雞作食豈有仙而殺者乎舊說南陽有菊水水甘而芳民居三十餘家飲其水皆壽或至百二三十歲蜀青城山老人村有見五世孫者道極險遠生不識鹽醃而溪中多枸杞根如龍蛇飲其水故壽近歲道稍通漸能致五味而壽亦益衰桃源蓋此比也歟使武陵太守得而至焉則已化爲爭奪之場久矣嘗意天壤之間若此者其衆不獨桃源余在穎州夢至一官府人物與俗間無異而山川清遠有足樂者顧視堂上榜曰仇池覺而念之仇池武都氏故地楊難當所保余何爲居之明日以問客客有趙令時德麟者曰公何爲問此此乃福地小有洞天之附庸也杜子美蓋云萬古仇池穴潛通小有天神魚人不見福地語真傳近接西南境長懷十九泉何時一茆屋送老白雲邊他日工部侍郎王欽臣仲至謂余曰吾嘗奉使過仇池有九十九泉萬山環之可以避世如桃源也

凡聖無異居清濁其此世心閑偶自見念起忽已逝欲知真一處要使六用廢桃源信不遠藜杖可小憇躬耕任力絕學抱天藝臂雞有時鳴尻駕無可稅苓龜亦晨吸狗或夜吠耘樵得甘芳齧齧謝炮製子驥雖形隔淵明已心詣高山不難越淺水何足厲不知我仇池高舉復

從來一生死近又等癡慧蒲澗安期境在廣羅浮稚川  
夢往從之遊神交發吾蔽桃花滿庭下流水在戶外却笑  
逃秦人有畏非真契

和劉柴桑

萬劫互起滅百年一踟躕漂流四十年今乃言卜居且喜  
天壤間一席亦吾廬稍理蘭桂藁盡平狐兔墟黃緣出舊  
枿紫茗抽新禽我本早衰人不謂老更劬邦君助畚鍤鄰  
里通有無竹屋從低深山窓自明疎一飽便終日高眠忘  
百須自笑四壁空無妻老相如



